

居易錄

函一
冊八
函

於易錄卷十

濟南 王士禛 著

國子監博士孔尚任字東塘曲阜聖裔博雅好古丙

寅丁卯間從故工部侍郎孫屺瞻

在

治下河在江都

得漢銅尺一上有文字曰慮虎銅尺建初六年八月

十五日造後又得一尺定爲司馬文正公布帛尺也

孔自作漢銅尺記周尺考周尺辨三篇極精核今儒

載于左方漢銅尺記云江都閔義行博雅好古所藏

銅尺一朱碧繡錯爲賞鑒家所玩余旣得之乃不敢

以玩物蓄焉古者黃鐘律曆疆晦冕服圭璧尊彝之

屬皆取裁于尺而周尺爲准自王制不講鄉遂都鄙之間各從其俗于是布帛營造等尺代異區分遺法蕩然況禮樂之大者乎此尺有文曰慮虓音虓銅尺建初六年八月十五日造慮虓乃太原邑建初則東漢章帝年號也考章帝時冷道舜祠下得玉律以爲尺與周尺同因鑄爲銅尺頒郡國謂之漢官尺此或其遺與漢代去周末遠且禮經皆出漢儒漢尺之存卽周尺之存也聞之先王制法近取諸身遠取諸物然後尺寸之度起何休曰側手爲膚按指知寸布手知尺此則尺之取諸身者也律曆志謂一黍之廣爲分

十分爲寸十寸爲尺此則尺之取諸物者也指有長短黍有巨細每不相符漢儒因有指黍二尺之辨此尺取指取黍固不能定今以中指中節量之適當一寸無毫髮差及纍黍試之正足一百何指與黍之偶符若此耶廣一寸厚五分重抵廣法十八兩歸之闕里凡造禮樂器皆准之准周尺也周尺考云虞書同律度量衡三代共之至秦不師古而後紛綸莫定迨六朝割裂之餘乃有大升大兩長尺不等當時調鐘律測晷景及冠冕禮制用小者餘公私俱用大者宋人考定制度集古尺法爲十五種曰周尺曰晉田父

玉尺曰梁表尺曰漢官尺曰魏尺曰晉後尺曰後魏
前尺曰中尺曰後尺曰東魏後尺曰蔡邕銅籥尺曰
宋氏尺曰隋水尺曰雜尺曰梁俗間尺而必以周尺
爲之本蓋非周尺無以定諸尺之失蔡邕獨斷曰夏
十寸爲尺殷九寸爲尺周八寸爲尺何以知其八寸
爲尺也王制曰周尺八尺爲步司馬法曰一舉足曰
跬跬三尺兩舉足曰步步六尺儀禮注武跡也中人
之跡尺二寸五武爲步步六尺故禮書以周六尺四
寸爲步又說文曰伸臂一尋八尺徐鍇曰六尺曰尋
小爾雅曰四尺爲仞倍曰尋包咸鄭康成皆以仞爲

七尺應邵以爲五尺六寸顏籀曰八尺爲仞取人臂
一尋語爲山九仞釋文曰仞七尺孟子掘井九仞註
仞八尺然皆不越乎八與六之間故禮書以周六尺
四寸爲尋六尺四寸者十寸之尺也十寸之尺六尺
四寸乃八寸之尺八尺也兩足步之如是兩手尋之
亦如是按禮記周尺鄭註周猶以十寸爲尺六國變
法度或言周尺八寸然亦非也所云周尺八寸者蓋
以當時所用尺較周尺之長短止當八寸故云周尺
八寸而非但用八寸也考工記于案言十有二寸于
鎮圭言尺有二寸則是周之長尺有十寸周之短尺

亦有十寸文公家禮言古尺五寸五分周尺七寸五分則又以宋時布帛尺較之矣郎瑛曰周八寸爲尺

秦比周七寸四分前漢官尺比周一尺三分七毫劉

歆銅斛尺後漢建武銅尺與周同

建初間得周玉律以爲尺謂之後漢官尺疑非建武

國蜀吳同周魏比周一尺四分七毫後魏前尺比周

一尺二寸七釐中尺比周一尺二寸一分一釐後尺

比周一尺二寸八分一釐晉田父玉尺

世說田父于野中得周時玉尺與

梁法尺比周一尺七釐後晉比周一尺六分二釐宋

齊尺比周一尺六分四釐梁表尺比周一尺二分陳

尺同後晉東魏比周一尺五寸八釐市尺與後魏後

尺同隋開皇官尺同上市尺官尺皆鐵尺萬寶常所造木尺比周

一尺一寸八分六釐以前多銅為之至此用木唐尺與古玉尺同貞觀中武延秀

為太常得玉尺以為奇玩獻而失之其迹猶存所定得六之五開元尺度以十寸為尺尺二寸

為大尺五代世短多相應襲志無考也惟周王樸所

定尺比周一尺二分有奇及宋二景表尺比周一尺

六分有奇胡瑗樂書黍尺比周一尺七分司馬光布

帛尺比周一尺三寸四分元尺傳聞至長志無考明

部定官尺皆依家禮布帛尺凡田畝布帛營造所用

悉同雖南北稍有參差然必以部定官尺為準五尺

為尋十尺為丈一百八十尺為一里五尺為步十尺

爲弓二百四十步爲一畝茲建初銅尺當明所用官
尺七寸五分明所用官尺卽宋布帛尺也布帛尺比
周一尺三寸四分固知銅尺與周尺無二周尺八尺
爲步八尺爲尋今以銅尺較止足六尺六寸五分或
者今人身短小故步尋較古減一尺若用明官尺六
尺爲步六尺爲尋而銅尺乃足八尺之數若再分銅
尺爲八寸更益二寸則是古十寸尺當得六尺四寸
之數我朝丈田稍增尺數每尺加一寸以明官尺
五尺五寸爲一步尋而銅尺又當用七尺四寸矣去
古日遠遺法莫考幸得漢銅尺與周尺相准歷代制

度了然無疑因詳書之以俟後賢參考焉周尺辨云
世儒考制度皆本周尺蓋三代損益惟周爲詳本之
是已然亦何所得周尺而本之哉或者皆臆說耳宋
潘時舉註家禮曰程先生本主之制取象甚精可以
爲萬世法然用其制者多失其真往往不考周尺之
長短故也蓋周尺當今省尺七寸五分弱而陳氏文
集與溫公書儀多誤註爲五寸五分弱而所謂省尺
者亦莫知其爲何尺時舉舊常質之晦翁先生答云
省尺乃是京尺溫公有圖所謂三司布帛尺者是也
繼從會稽司馬侍郎家求得此圖其間有古尺數等

周尺居其右三司布帛尺居其左以周尺較之布帛尺正是七寸五分弱因圖二尺長短而著伊川之說于其旁庶幾用其制者可以曉然無惑余觀家禮三尺圖各分十寸爲冊幅所限僅圖尺形而非尺准也其古尺圖註云當今省尺五寸五分弱周尺圖註云當三司布帛尺七寸五分弱當浙尺八寸四分三司布帛尺圖註云卽是省尺又名京尺比上周尺更加三寸四分當周尺一尺三寸四分當浙尺一尺一寸二分蓋司馬公家有石刻本故其說可據今刻本已不可見而世但以家禮所圖爲尺式豈知乃尺形非

尺准也如爲尺准何以短二寸五分之周尺與長三寸五分之布帛尺式相等耶世儒紛紜傳會止據冢禮之尺形余故知其皆臆說也今旣得建初銅尺與周尺同周尺旣定何尺不定因定曰建初銅尺與周尺同當古尺一尺三寸六分當漢末尺八寸與唐開元尺同當宋省尺七寸五分當宋浙尺八寸四分當明部定官尺七寸五分弱當今工匠尺七寸四分當今裁尺六寸七分當今量地官尺六寸六分當今河北大布尺四寸七分余之能定者以有建初銅尺在也設無之此說亦臆矣

予鄉文獻舊家以臨朐馮氏爲首初閩山公裕居遼東從賀醫閩學中正德進士官止副使歸居青州有四子惟健舉人惟重進士官行人惟敏舉人官通判惟訥進士官光祿寺卿惟訥字汝言最有文名著古詩紀風雅廣逸諸書惟健字汝強以詩名惟敏字汝行詞曲爲明第一手惟重字汝威名稍遜伯叔季而其子子咸以進士官給事中夢天帝以韓魏公爲其子遂生文敏公琦官至禮部尚書號文章經濟大儒光祿曾孫易齋公溥本朝官少傅文華殿大學士兼刑部尚書數代皆有集傳于世

院寺舊無員外主事之名後翰林院起居注添設主事四員太僕寺員外郎八員皆以滿洲人爲之

同年僉都御史陳省齋肇昌黃岡人有六子次子大章康熙戊辰進士翰林庶吉士第四子大羣五子大華庚午同捷楚榜大華又解元也是科長子大年亦中順天副榜第一省齋卽于是冬擢僉憲父子兄弟極一時之盛朝士榮之後幼子大輦又中壬午鄉試陳司空說巖招同朱竹垞姜西溟飲觀東坡穎沙彌書迹帖凡數百字甚奇又觀劉松年宮蠶圖門人蒲城趙舉人善昌貽曹全碑碑在漢隸中最爲

完好書法圓美此碑萬曆時出于邵陽歲月未久故
鮮剝缺趙岫石墨鐫華于奕正金石志始載之都元
敬著金薤琳琅未及見也碑尾署中平二年十月丙
辰造

郭祥正功父青山集閩謝氏寫本六卷古詩二卷近
體詩四卷七言歌行僅二篇或有闕文也祥正多與
王安石倡和之作李之儀晚居姑孰與祥正有隙至
爲詩排詆最力蓋各有所主也方安石當國祥正上
言請以天下大計專聽相公區畫罷一切異議者其
人可知已詩格亦不高偶喜其三絕句云原武城西

看杏花紛紛紅雪委泥沙何如姑孰溪頭見照水蒙
煙小謝家又渡江乘興泊江干草襯殘花色未乾慣
在釣魚船上住一簑一笠伴春寒又籃輿投曉出重
城桃李無言似有情淡白輕紅能幾日可憐吹洗過
清明又稻秧才一寸蠶子始三眠

句

張光啓字元明章丘人世居白雲湖上少爲諸生有
名爲梅長公朱未孩二公所知崇禎庚辰年四十遂
棄諸生闢一圃曰省園以種樹藝花自樂亂後足不
履城市年八十餘卒有張仲集詩若干篇予刪存百
餘首往往可傳嘗有句云盡日閑看高士傳一生怕

讀早朝詩卽其志可知也

宋時士大夫多重充墨余已記之前卷讀范宣公集
有充墨詩云誰爇長松製作勤輕煤勺膩雜蘭薰中
疑玄石無纖翳外似靈犀有密紋溪石乍研浮紫翠
蜀牋試寫落煙雲會將點畫傳青簡千古忠邪爲爾
分忠宣公不以詩名五言如溪風消酒力煙樹入春
愁最工

李戶部說蜀有墨猿通體黝黑可愛常于樹上騰跳
足不履地獵者不能獲又有謳猿其聲如謳

四川道監察御史陸龍其疏言孝道爲萬事之本奪

情非治世所宜仰祈 聖斷以維綱常事臣辦事署
中聞九卿科道會議湖南巡撫于養志在任守制一
事臣以資淺不在會議之列不知所議云何及詢與
議諸臣謂會議之時昌言其不可者固有其人而依
違不斷者比比而是臣竊怪之此明白顯易之事有
何可疑而依違若是夫治天下之不可不以孝易明
也在任守制之非所以教孝易明也天下正當承平
之時湖南又非用兵之地無藉于在任守制易明也
皇上以孝治天下在廷諸臣沐浴于 皇上
孝治之中久矣何難一言直斷其不可耶且臣不知

議者以于養志爲何如人如其非賢者耶則固不當使之在任守制矣如其誠賢者耶則必不肯安心于在任守制矣在督臣代爲題請或從愛惜人才起見然臣以爲使之解任全孝正所以深愛惜之況

皇上一日所行天下萬世奉爲法程者也若使一撫臣因督臣之題請而畱將來督撫之丁憂者皆將援此以爲例其不思僥倖奪情者鮮矣名教自此而弛綱常自此而壞此端一開關係天下實非淺鮮至于湖南一省之人是則是傲不復知有父母又無足論

矣云龍其字稼書平湖人庚戌進士初官嘉定知縣

有廉名巡撫慕天顏惡之疏劾降級故尚書魏敏果
象樞力言于朝得還職補靈壽知縣今年夏五月

詔九卿舉廉吏龍其與三河知縣彭鵬清苑知縣

邵嗣堯麻城知縣趙蒼璧四人奉 特旨行取彭

給事中邵陸趙三人俱御史

梅文鼎字定九宣城諸生也著中西算學通若干卷中

者中國之法西者泰西之法也其書有九一日籌算

目有七曰乘除平方立方帶縱平方帶縱立方開方捷法開方分秒 二曰筆算 目六曰加減乘除異乘同除開方其別有二曰西域法回回法

三曰度算 目十曰平分線分面線分體線更面線更體線分圓線正弦線割線切線五金線 其別為矩算 四曰比例

算 目二曰比例四線 目三曰比例四線新比例 五曰幾何摘要 目三曰線面體 六曰三角法 目二曰平三角

算 目二曰比例四線 目三曰比例四線新比例 五曰幾何摘要 目三曰線面體 六曰三角法 目二曰平三角

角 弧三

七日方程論

目六曰正名極數致用刊誤測量雜法

八日勾股測量

目二曰測高測深測遠

其別有六曰矩度矩尺象限儀鏡測笠測扇測

九日九數存古

目九曰方田粟布差分少廣均輸商功盈不足方程勾股

梅

精于曆學嘗合七十餘家著曆學通考亦今之異人也

予家世業毛詩幼時即疑晦菴臆改小序之非宋元明已來駁之者甚衆非予創論也嘗欲輯歐蘇呂嚴諸家之說作為一書嘗著其說于木瓜詩辯猶恨藏書少耳頃得崑山新刻經解又數種如逸齋補傳成伯璵指說李樗黃樵集解朱倬疑問朱善解頤詳略雖不同要皆可互相發明獨王栢詩疑輔廣童子問

朱鑑遺說朱升劻注傳會固陋無足采錄

武昌舉人葉道復以其父工部主事井叔

封遺詩來

井叔本嘉興人寓黃州順治己亥進士篤實君子也由登封令入爲兵馬司指揮其族弟文敏公方藹介于予以詩來質予盡刪其舊作獨取其嵩山詩五六十篇爲嵩遊集序而刻之又選其己未庚申詩刻之列其詩于十子中于是井叔之名益噪康熙己未以博學宏詞徵罷歸及吏部銓授虞衡司主事而井叔已前卒年六十餘矣井叔精爾雅說文學有根柢所輯嵩山志嵩山石刻集記皆可傳

并叔未第時酷貧嗜讀書家樊口湖中王宗伯吳廬

澤

弘常扁舟過之值湖漲不辨涯涘日已暮聞有書聲

出蘆荻中先悲哀而後愉樂曰此必并叔也迹之果然

文則詩則各三卷周居岐撰居岐字伯康號與泉濟南歷城人嘉靖間官當塗知縣周吾里前輩無詩文名然其自序二篇甚有理致

穎川劉氏閨閣皆知書同年公職吏部往爲予述其女姪名第五幼工詩兼能古文從姪樞妻李氏亦工詩予壬子使蜀時樞令洪洞李以詩卷來相質今皆

歿矣第五之女姪名令佑塋為公馘甥寧權益賢子
婦今年才二十詩詞書迹山以至金石篆刻皆臻妙何
巾幗之多才也嘗為予刻一小印款云潁川女士

康熙三十年辛未元旦

上御太和門受朝賀午

賜宴召滿漢內閣大學士學士六部尚書侍郎

都察院都御史副都御史上殿

賜酒是日風日

暄霽仰瞻

天顏悅豫羣臣皆喜

以太僕寺卿李元振為都察院左副都御史

胡副憲昇
猷以疾卒

位于

命禮部尚書熊賜履兵部督捕侍郎王士禛俱以原

銜充 經筵講官先是大學士徐公元文以兼領翰
林院掌院事不解講官去年某月罷禮部尚書張公
玉書爲文華殿大學士例解講官翰林院以部院由
翰林出身諸臣名上畱中數月至是以仲春 經筵
屆期特有是 命士禎以菲才與焉旣感 聖
恩高厚益自愧報稱之難也

二月初二日同兵書李公天馥刑書杜公臻工書陳
公廷敬吏侍李公振裕赴 起居注館會看 經筵
講章先是翰林院進擬題目 欽點孟子后稷教民
稼穡一段尚書六卿分職一段講章則張公英及陳

公撰也

以大理寺少卿唐朝彝爲太僕寺卿山東布政使衛
旣齊爲順天府府尹

初六日晨內閣九卿啓 奏乾清門辰刻奉 旨

以戶部尚書文華殿大學士張玉書 經筵講官工

部尚書陳廷敬兵部右侍郎李光地 經筵講官兵

部督捕右侍郎王士禛爲會試主考官禮部左侍郎

王颺昌爲知貢舉官同考十八人翰林院編修許承

家等七人兵科掌印給事中卞三畏等四人吏部郎

中鍾儀傑等七人宴于禮部 賜金花絲緞表裏各

有差宴畢入鎖院

二十七日恭呈十卷進

御覽次日奉

旨着

考試官自定次第先是二十四年乙丑科會試主考

官刑部尚書張公士甄

今吏部尚書

等始進擬十卷恭請

上裁 欽定名次以陸肯堂為第一戊辰已來遵

為定例然戊辰亦未 欽定云

三月初一日放榜中式舉人百五十六人會元張瑗

江南祁門人滿洲巴海等四人烏金超哈胡麟徵等

二人

以試監察御史邵嗣堯為直隸守道叅議舊例科道

官非外轉無出爲監司者至是守道缺奉 特旨

直隸守道員缺緊要着以邵嗣堯轉補重其選也

掌河南道監察御史王承祐疏請以安慶廬州鳳陽
三府滁和徐三州仍歸南卷舊例會試以廣西四川
雲南貴州四省及江北三府三州爲中卷自丙辰科
以滇黔亂去中卷之名以三府三州歸南卷雲南平
復舊是科榜發廣西雲貴三省遂無一人入彀者故
言官有是請部議允行

徐編修元正子貞貽石門呂氏新刊司馬文正公稽
古錄二十卷首有文正公進表一首朱文公與鄭知

院書以爲此書當與六經同進講筵云

貴州巡撫田中丞子綸斐寄所著黔書乞序中述名

宦頗及先太僕太師二公太僕嘉靖中官貴州監司
歿于黔今永寧衛有專祠太師則萬曆中以兵侍總
督川湖貴州軍務云

盤山拙菴智朴禪師以所創山誌若干卷屬叅訂頗
有體裁所錄碑刻詩文等亦不汎濫所述山中物產
一卷尤雅

田子綸中丞作黔書凡七十六篇篇不一格其記苗
蠻種類記水西烏蒙馬記革噐記朱砂水銀雄黃訛

里鉛莠醬邛竹諸篇有似爾雅者似考工記者似公
穀檀弓者似越絕書者讀之如觀化人之戲故相國
孫文定公泚亭作顏山雜記記山蠶琉璃窑器煤井
鐵冶等文筆奇峭亦如此

戊辰春予來京師朱太史竹垞招飲古藤書屋食半
翅甚美不知是何鳥閱盤山新誌云爾雅鷓鴣冠雉
郭璞注鷓大如鴿似雉鼠脚無後指岐尾爲鳥愍急
羣飛出北方沙漠盤山多有之土人呼爲半翅卽沙
雞也一名鐵脚

拙菴山居詩有極似寒山子者其佳句如雪衲經時

補春薪帶雨燒青溝一派水紫蓋萬重山閑心將白日隨意斬青茅木蛇鱗甲異俊鷁羽毛青蒲團安養地秋色淨居天鬢從新處白天自舊來青竹牕來夜月茆屋隱春雲皆可誦

庚午于慈仁寺市得如臯孫應鰲淮海易談四卷每舉以語揚之士大夫訪其他所著書輒無知者讀黔書乃知公字山甫本如臯人籍清平衛嘉靖己酉舉貴州鄉試第一癸丑進士改庶吉士歷僉都御史撫治鄖陽入爲大理卿以禮侍掌國子監祭酒事終南京工部尚書萬曆庚子黔撫郭子章爲請諡諡曰文

恭始青螺入黔鄒南臯謂之曰黔孫淮海李同野馬
心菴皆致力道學君此行情不及見三君耳又胡正
甫語青螺宇內講明正學楚有黃安耿公蜀有內江
趙公黔有清平孫公豫章有南城羅公孫公著述有
學孔精舍類稿教秦語錄春秋節要律呂分解等書
易談其一耳

史多曲筆所謂盡信書不如無書也漢昌邑王之事
吾嘗疑之及讀東坡所論始暢然坡云觀昌邑王與
張敞語真清狂不慧者烏能爲惡旣廢則已矣何至
誅其從官二百餘人以吾觀之從官中必有謀光者

光知之故廢賀非專以淫亂故也二百人者方誅號
呼于市曰當斷不斷反受其亂此其有謀明矣特其
事秘史無緣得之著此者亦欲後人微見其意也武
王數紂之罪孔子猶且疑之光等數賀之惡可盡信
耶論世者須具如此識力乃不墮古人雲霧中

十八日

萬壽節

上不受朝賀免廷臣進表

惟在外督撫進表如故

二十三日

御太和門傳臚

賜中式舉人戴有

祺及第第一初讀卷官內閣九卿擬吳昺第一有祺
第二楊中訥第三旣進 御覽改有祺第一昺第

二黃叔琳第三中訥居二甲之首曷全椒人故禮科
給事中國龍子對策倣陸宣公奏議
上以書法

拔有祺狀元而曷次之又以鼎甲久無北人拔叔琳
次曷叔琳大興人中訥海寧人同年兵部左侍郎雍
建子遇合之有定數如此

有祺戊辰進士休寧人籍華亭 本朝狀元非本科
中式者壬辰之鄒修撰忠倚己丑中式甲辰之嚴侍
郎我斯榜眼李都御史元振皆辛丑中式及此而三
添設盛京兵部調兵部左侍郎舜拜爲盛京兵部侍
郎盛京舊止設戶禮刑工四部侍郎及郎中等官至

是奉 旨添設戶科給事中王原祁因疏請倣明
南京例并添設漢侍郎以下下九卿詹事科道會議
不行

曷試卷在會闈予所特拔及拆號王少宗伯吳廬亟
稱之明日榜發入 朝遇李少宰醒齋振裕王閣學鶴

汀尹方皆爲主司賀得人李前督江南學政王卽庚午

江南鄉闈主司也曷父伯叔兄弟五人進士第者凡

四其世父國對順治戊戌一甲第三人也兄晟丙辰

進士從兄昇戊午舉人蓋家學云後其弟早又中壬

午順天鄉試

人家科第在積學種德堪輿之說非所論也然亦有
灼然可信者門人全椒吳昺述其曾祖體泉翁爲父
卜吉壤致閩人簡堯坡者于家廩餼甚厚簡日爲擇
兆域三年不可得辭歸翁固畱之一日同往梅花山
中遇大雪同飲陳家市酒樓簡倚檻遠眺久之罷酒
起曰異哉吾遠近求之三年不得乃在此乎遂同往
三里許審視良久曰是矣雪晴更往觀之喜曰天賜
也得此地足報君矣然葬後君子未卽發至孫乃大
發發必兄弟同之對面文峯秀絕發必鼎甲然稍偏
未必鼎元或第二第三人亦不僅一世而止翁如言

卜葬其後孫國鼎字玉鉉中崇禎癸未進士國縉字
玉林順治己丑進士國對玉隨國龍玉駟學生玉隨
順治戊戌進士及第一甲第三人官翰林侍讀玉駟
亦癸未進士官禮科都給事中至昺兄弟又前後舉
科第而昺今辛未科及第一甲第二人簡之術亦神
矣

兵部職方司督捕主事齊祖望雞澤人予令訪其縣
人殷岳伯巖遺集得畱耕草堂詩一卷僅讀史三十
首登嵩登岱詩各六首餘十八首共五十餘篇皆五
言古體也殷平生不爲律詩永年申涵光和孟序之

云宗山不多作詩復不耐聲偶爲古詩淳龐淵穆莽
莽可敵萬夫乙未正旦祀先畢卽阜帽跨驢攜一童
子遊嵩少婆婆緱嶺有遺世之思已乃入大駮大駮
人好之畱數月予與傅掌雷太史將登岱宗山衣塵
未拂欣然同往時方病腰脊比歷天門松聲謾謾萬
山在下大叫奇絕棄肩輿步登不知沉疴之去體也
夜宿岳頂予二人憊而偃卧宗山夜數起謂羽人日
出時喚我已而雨聲浙瀝少止卽躍起視戶外以星
辰隱見爲憂喜竟夕不寐其嗜奇癖山水如此宗山
亦殷字也予往見其詠史詩于國門集古鬱涼壯有

橫梁之風河朔一奇士也和孟節愍公子有高義與
予兄弟相友善同時有張蓋字覆輿狂士詩亦奇皆
廣平人又趙湛秋水劉逢源津逮亦廣平人能詩皆
與予善

錢牧翁撰列朝詩大旨在尊李西涯貶李空同李滄
溟又因空同而及大復因滄溟而及弇州索垢指癥
不遺餘力夫其駁滄溟擬古樂府擬古詩是也并空
同東山草堂歌而亦疵之則妄矣所錄空同集詩亦
多泯其傑作黃省曾吳人以其北學于空同則櫛之
于朱凌谿應登顧東橋麟輩亦然予竊非之偶著其

略于此牧翁于予有知己之感順治辛丑序予漁洋詩集有代興之語寄予五言古詩云勿以獨角麟儷彼萬牛毛今三十餘年先生墓木拱矣予所以不敢傳會先生以誣前輩者亦欲爲先生之諍臣云爾

西涯相業大有可議卽劉謝去國一語李百喙何以自解牧翁乃強以擬東坡不知其人品相萬也又欲以顧文僖魯文恪輩追配黃秦晁張以予論之未見其可

襄城李來章本名灼然以字行改字禮山常執經于予工爲古文戊辰下第與中牟冉覲祖永光同居嵩

下從宮詹逸菴耿先生講學各有詩一卷庚午冬公車見之予曰詩三百主言情與易太極說理判然各別若說理何不竟作語錄而必強之爲五言七言且牽綴之以聲韻非蛇足乎荆川之徒撰白沙定山及荆川詩爲二妙集繼擊壤集後以爲詩家正脉菘林傳爲笑柄詎可踵其陋哉

牧齋訾訾李何則并李何之友如王襄敏孟大理輩而俱貶之推戴李賓之則并賓之門生如顧文僖輩而俱褒之他姑勿論東江集予所熟觀詩不過景泰成化間沓拖冗長之習由來談菘家何嘗推引而遽

欲揚之王子衡孟望之之上豈以天下後世人盡聳
瞽哉

門人盛御史珍示

符升

自吳中寄古文正集十卷續集

二十二卷崑山葛稟字端調刊本也正集自左國迄
唐宋六家之文而李習之與焉續集自唐魯公敬輿
文饒牧之逮宋韓范司馬以下以及南宋朱晦菴陳
同父真西山諸公元則劉靜修虞道園二家予家舊
有正集續則訪之十餘年而不得者唐文如獨孤常
州元道州呂衡州權載之李觀沈亞之司空表聖孫
樵劉蛻陸龜蒙皮日休羅隱輩宋文如石守道柳仲

塗尹師魯穆伯長秦少游陳履常晁以道无咎羅端
良陸務觀葉水心輩予家皆有其集雖利鈍互見要
之有可觀者暇當掇拾編綴更爲一集以廣此書之
所未及

錢牧翁云王侍郎損仲

惟

畱心宋後三史苦宋史煩

蕪刪定成書吳興潘昭度鈔得副本損仲家圖籍沈
于汴京之水未知吳興鈔本云何庚午歲石明呂葆
中無黨遊太學至京師予見其行笈有此書蓋詳
本塗乙宛然凡二百五十卷首紀次表次傳次志紀
十五表五列傳二百志三十通爲宋史記其義例大

略本紀則更瀛國公爲帝熯增端宗帝昺二紀年表
于宰輔外增南唐諸國及遼金二表而附以夏國宗
室傳于英宗皇考濮王孝宗皇考秀王之後增理宗
考榮王希彊改南唐北漢世家依漢書項羽例總名
列傳宰執中如王安石之亂法耿南仲之悞國皆特
書以示戒若庸臣如李昌齡姜遵輩倣漢書陶青劉
舍之例止于他傳末附見姓名年表具爵位而已史
彌遠嵩之一代窮奇李知孝梁成大相門鷹犬舊史
于二史虛事褒揚梁李徒有官簿并從刊正諸史止
有儒林宋史始列道學道學之目乃賈同胡紘諸奸

刪之以攻朱熹者今刪去道學通曰儒林舊史奸臣
傳倣新唐書例然既列惇布諸人而史彌遠之易皇
嗣史嵩之之醜直臣罪豈可貫史家據事直書忠邪
自見不必復別之爲奸始足懲戒也若薛昂羅汝楫
陳自強王次翁之流皆附諸奸本傳之下志則曆法
刪天文五儀衛輿服郡邑禮二志併入樂食貨河渠兵刑百官選舉
凡十篇卷帙繁重未及繕寫聊述其大凡于此吉木
劉晉卿同升狀元亦曾刪定宋史江右游經兵燹不知
其書猶有存否朱竹垞云此書改定目錄是湯養仍
親筆詳錢牧翁東都事略跋中

戶部郎中宗人培益仲示新著周禮左傳國語刊誤
益仲舊著二十一史通鑑綱目刊誤二卷亦讀書稽
古之士

居易錄卷十終

居易錄卷十一

濟南 王士禛 著

繹州趙師尹字子衡作石鼓文音注考異其自序曰
周宣中興續雅十見籀詩石鼓之文視車攻吉日不
知孰爲橐草唐貞觀中始出太史采詩之遺非孔子
所刪也後百六十餘年至韓氏愈尚毫髮無譌又三
百年宋蘇氏軾摹其文一鼓已泐間有訓注或未身
詣鼓旁或并罕見蘇本惟潘廸陶滋親見石鼓陶與楊慎趙宦光又皆得蘇本競相揣
量迄無諦據元潘氏廸作音訓辰吞章止一鼓字字
存三百八十六今礪滅又四十六世無摹本元文寢

剝從誰究詰乎由唐距今幾經罅裂幾經塌損宋大
觀中金填其文又經匠斲未免以說文釋籀或采諸
注則又以隸釋籀矣說文所存籀書二百餘三爾其
在石鼓僅九字全文七百餘三而什一不見于說文
烏可以說文釋籀耶諸家詁訓言人人殊此是彼非
已難險度鼓孔子所不得見許慎所不得說而欲以
意求之其于籀果何如又烏可以隸釋籀耶天不欲
斯文盡喪幸存蘇本蘇在金填匠斲先七十載所見
必真趙氏宦光爲章句爲補亾恃有此爾陶氏楊氏同余原
本六書考據諸氏糾其失六十又三亦恃有此爾蘇

不摹籀則籀已亾繼蘇摹籀籀書不尚存天地乎茲
鼓在岐陽榛莽千四百餘年而石理未損唐至今僅
千餘年大半湮沒鑿曰也填金也沈諸水也如使石
能言必且曰吾出而覘于世吾厄也吾入廟而蒙以
金毋寧岐陽榛莽爾匪剝奚駁匪摹奚存摹而存非
吾儒之責誰責乎余絳諸生也摹注以傳僅此爾周
宣大閱又十見籀鼓所謂樂石者也貞諸樂石畱諸
太學亦曰此周詩爾孔子而在義合存周孔子之徒
應仕朝列代不乏人奏大君附小雅與車攻吉日並
垂千古是其在後君子所引據書凡五十二部博雅

士也朱竹垞翰林著日下舊聞亦作石鼓考三卷

朱翰林學士楊億大年武夷新集二十卷景德丁未
大年在翰林所自編定也詩五卷雜文十五卷閩謝
在杭寫本大年以西崑體擅名宋初其詩在同時錢
劉諸公之上攬其全集警策絕少文皆駢體大抵五
季已來風氣如此而石守道作怪說三篇刺之張皇
其詞亦過矣介最推柳仲塗至擬之周孔尤妄予嘗
于池北紀談辨之

古靈集二十卷宋樞密直學士陳襄述古著李忠定
公綱序從孫知贛州輝跋予擘撰年譜一卷附集後

詩六卷雜文十四卷

以書啓狀序記內制壽狀劄子詳定禮文祭文議論策問易履講義誌銘爲次

亦謝

氏寫本述古熙寧中在講筵論薦司馬溫公已下三十三人各有品薦皆定論也司馬公云忠亮正直以道自任韓持國云器識方重學亦醇正呂正獻公云道德醇明學有原本以進賢汲善爲已任蘇子容云記問博洽長于史學國朝典故多所練達孫莘老云素有鄉行明經術義理之學李公擇云性行醇正兼治經術可比孫覺卽莘老范忠宣公云忠義骨鯁其才足以濟大事蘇文忠公云豪俊端方雖不長于經術然子史百氏之書無所不覽居官敏恕尤通政事曾子

固云以文學名于時詞近典雅與軾之文各爲一體
孫巨源云博學能文所守亦端可充文翰史臣之選
劉莘老云性行端淳詞學淵邃置之文館必爲遠器
程明道云性行端醇明于義理可備風憲之任張橫
渠云學行修明養心事道不苟仕進西方學者如載
一人而已蘇穎濱云其學與文若不逮軾而靜厚過
之孔經父云性行淳粹如不能言發爲文章溫厚正
直王平甫云材器磊落文亦豪邁向居罪廢不忘進
學鄭介夫云小臣愚直敢言發于忘義非陛下矜憐
其志使得生還誰復爲俠言者讀述古薦章可想見

當時人才之盛而元祐更化首相溫公申公衆正盈
朝不外所薦諸君子使宰相爲國用人公忠如此古
云器使何以加茲今集中以此列編首而冠以紹興
元年求賢手詔略云近得陳襄薦章起草司馬光而
下三十三人德行言語政事文學皆所具備審如所
薦斯爲極矣後世瞻之仰之以襄爲何如人耶

四月十二日 車駕出塞百官跪送于東華門以
喀爾喀七旗部落內附故也

宋謝邁幼槃竹友集十卷詩七卷雜文三卷謝方伯
在杭手鈔本邁臨川人逸之弟江西詩派二十五人

之一也在杭跋云幼槃詩文不傳于世此本從內府
借出時方沍寒京師傭書甚貴需銓京邸資用不贍
乃手自鈔寫每清霜呵凍十指如槌幾二十日始克
竣帙藏之于家亦足詫一段奇事也萬曆己酉十二
月二十四日辛酉前有苗昌言呂本中二跋幼槃詩
居仁稱其似宣城非也在江西派中亦清逸可喜然
涪翁沉雄豪健之氣則去之遠矣顏魯公祠堂十八
學士圖諸長歌頗佳格詩如尋山紅葉半旬雨過我
黃花三徑秋按芭蕉葉展新綠從史榴花開晚紅瘦
藤柱下萬峯頂野鶴來歸千歲巢皆佳句又靡靡江

離只喚愁眼中何物可忘憂
棟花淨盡綠陰滿纔見
一枝安石榴甚有風致非蘇黃門庭中人不能道也
無逸詩尤有名溪堂集視此未知何如耳

鄞人萬斯同字季野明都督表之後舉人泰之子黃
宗羲太冲之弟子也投予所著禘說八篇駁鄭康成
之非而据唐趙匡宋程子之說以爲證其言甚辯而
核又嘗補歷代史表五十四卷凡六十篇益以明史
表一十三篇曰東漢世表外戚侯表雲臺功臣侯表
宦官侯表將相大臣年表九卿年表曰三國漢季方
鎮年表魏諸王世表漢諸王世表吳諸王世表魏國

將相大臣年表魏將相大臣年表魏方鎮年表漢將

相大臣年表吳將相大臣年表曰晉諸王世表功臣

世表僭偽諸國世表將相大臣年表東晉將相大臣

年表方鎮年表東晉方鎮年表僭偽諸國年表偽漢

將相大臣年表偽趙將相大臣年表偽燕將相大臣

年表偽秦將相大臣年表偽燕慕容垂將相大臣年表南

燕將相大臣年表偽秦姚萇將相大臣年表偽成將相

大臣年表曰宋諸王世表將相大臣年表方鎮年表

曰齊諸王世表將相大臣年表方鎮年表曰梁諸王

世表將相大臣年表曰陳諸王世表將相大臣年表

曰魏諸王世表異姓諸王世表將相大臣年表西魏
將相大臣年表東魏將相大臣年表曰北齊諸王世
表將相大臣年表曰後周諸王世表公卿年表曰隋
諸王世表大臣年表曰五代諸王世表將相大臣年
表吳將相大臣年表南唐將相大臣年表前蜀將相
大臣年表後蜀將相大臣年表南漢將相大臣年表
北漢將相大臣年表十國興廢年表方鎮年表李鄴
嗣序又云三國則做大事記作三國大事年表隋唐
之際則做秦楚之際作月表觀其目錄可知其史學
之淹通也斯同兄斯大字充宗深于經學予及見所

著學禮質疑太冲序之其姪言字貞一予門人也能
古文有管村文集鄴又有陳赤衷者字葵獻亦邃于
經學在太學從予遊歿于京師嘗鈔袁桷清容集遺
予又董允瑫字在中舉人丙辰公車嘗以古文質予
皆太冲門人亦早歿黃之子百家今在京師

宋樓宣獻公鑰攻媿集八十五卷溫陵黃氏寫本詩
僅九卷雜文七十六卷諸體中題跋最勝宋集多叢
冗此集如表狀內外制書啓之類刪去半部亦可宣
獻與楊誠齋范石湖陸放翁同時詩亦石湖伯仲歌
行學蘇黃氣或不道格詩苦鈍然不爲楊范佻巧取

蟾七字如行盡杉松三十里看來樓閣幾由旬一百
五日麥秋冷二十四番花信風水真綠淨不可唾魚
若空行無所依雖宋調亦佳句也

樓攻媿集跋坡書三笑圖贊辨慧遠法師陶淵明陸
修靜始末甚詳錄之以備參考云坡書三笑圖贊不
言爲誰山谷實以陶陸遠公事陳舜俞廬山記亦云
舉世信之宗室彥通作廬山獨笑一編乃以謂遠公
不與修靜同時予因其言細考之十八高賢傳遠公
卒于晉義熙十二年丙辰年八十三而吳筠所撰簡
寂陸君碑修靜卒于宋明帝元徽五年丙辰去遠公

之亾正一甲子而修靜年七十有二推而上之生于
義熙之三年丁未遠公之亾修靜才十歲況修靜宋
元嘉末始來廬山遠之亾已三十餘年淵明之亾亦
二十餘年矣淵明生于晉興寧之乙丑少遠公三十
一歲卒于元嘉四年丁卯遠亾時淵明年已五十矣
固宜相從姑志之以示好事者

攷魏又跋宇文廷臣所藏吳彩鸞玉篇鈔云始予讀
文簫傳言吳彩鸞書唐韻事疑其不然後于汪季路
尚書家見之雖不敢必其一日可辨然亦奇矣爲之
賦詩且辨其爲陸法言切韻茲見樞密宇文公所藏

玉篇鈔則又過之是尤可寶也既謂之鈔竊以爲如
北堂書鈔之類蓋節文耳以今玉篇驗之果然不知
舊有此鈔而書之耶抑彩鸞以意去取之耶有可用
之字而略之有非日用之字而反取之部居如今本
皆以朱字別之而三字五字止以墨書字之次序皆
不與今合皆不可致詰輒書前歲所與汪氏詩跋于
左庶來者得以覽觀今玉篇唯越本最善末題吳氏
三十一娘寫問之越人莫有知者楷法殊精豈亦彩
鸞之苗裔耶

攻媿跋唐昭宗賜禧實鈔書云張唐英著外史檇杌

王建永平四年書張琳始末有云大順初僖實爲黔
南節度辟爲推官僖字唯集韻有之與喜同他未之
見鄧校書名世古今姓氏書辨證引禱杙之說且曰
姓書未有此氏今增入乃知姓僖而名實也又邵御
史嗣堯云臨淄有泊姓又近見序齒刻錄有香姓靜
姓予向于池北偶談皇華紀聞二書頗記所聞見異
姓因并錄于此以廣異聞

朱竹垞云今
禱杙無此條

圖繪寶鑑宋仁宗嘗畫龍樹菩薩又善畫馬徽宗宣
和御墨至今流傳尤多然不聞欽宗工畫也攻媿集
有恭題欽宗御畫十八學士圖云唐文皇十八學士

猶在秦府蓋武德四年也仰惟欽宗皇帝毓德青宮以仁孝恭儉聞天下手臨舊畫而又親灑宸翰以誌之誠有慕于正觀之盛云則欽宗在儲位薰習宣和之風亦攻繪事而諸書皆不載非宣獻此跋世竟無知之者矣

五月十八日

大駕還京師二十一日內閣九卿

翰詹府寺科道等衙門以喀爾喀土謝圖汗札薩克圖汗車陳汗率諸濟農那顏台吉等七旗之衆舉國內附上表賀請上尊號不許

二十一日

上御乾清門

欽選進士楊中訥

等三十一人爲庶吉士漢軍胡麟徵滿洲阿金喀爾喀與焉

監察御史江縈條奏會試事宜奉 旨與御史王

承祐前疏下九卿詹事科道再議以直隸山東爲北左河南山西陝西爲北右江南浙江爲南左江西湖廣福建廣東爲南右四川雲南爲中左廣西貴州爲中右從江請也得 旨允行著於功令

吏部尚書張士甄罷總督倉場戶部右侍郎李廷松光祿寺卿金鼐罷

兵部尚書李天馥遷吏部尚書原任侍郎石文桂爲

總督倉場戶部右侍郎左通政劉楷遷光祿寺卿

國初勅設兵部督捕衙門滿漢左右侍郎二人滿洲
左右理事官二人漢協理督捕太僕寺少卿二人旋
改左右理事官滿漢郎中各一人滿洲員外郎主事
若干人漢員外郎一人主事六人分理八司治八旗
遁逃及京城盜賊緝捕之事凡三營將弁之屬皆隸
焉蓋古僕區之法亦明戎政遺意也康熙辛未以三
營改隸九門提督而督捕乃專司逋逃之事矣

前太子太傅保和殿大學士兼戶部尚書致仕成克
鞏卒公大名人崇禎癸未進士卒年八十五無諡

六月初二日羣臣再疏請上尊號畱 中

前卷記唐詩人河南劉方平累代闕閱之盛按唐書

河中盧綸子姓貴盛功名著聞唐之詩人亦罕其比

綸子四人簡能簡辭弘正簡求皆有文名登進士

李衛公對

文宗云

簡能字子拙司封郎中簡辭字子策歷戶兵刑三

部侍郎工刑二部尚書兼御史大夫忠武山南二軍

節度使弘正字子強歷工部侍郎戶兵二部尚書武

寧宣武二軍節度使贈右僕射簡求字子臧歷工刑

二部尚書兼御史大夫義武隴西二軍節度使太原

尹以太子太師致仕贈左僕射唯簡能不登六卿其

子知猷歷兵部侍郎戶工二部尚書右僕射太子少師兼太師檢校司空簡求子女弼仕後唐歷官戶部侍郎贈兵部尚書簡求子嗣業禮部郎中其子文紀仕後周官至中書侍郎平章事

六月十五日進呈辛未科會試錄士禎例撰後序

朝邑李瓚中黃以其父岸翁遺墨來求跋岸翁名楷關中耆宿國初仕爲寶應知縣高才凌物爲忌者所中罷官平生作詩文每廣坐酒酣令兩人張絹素正紙懸腕直書略不加點如疾雷破山怒潮穿脇移晷而罷擲筆引滿旁若無人舉坐爲之奪氣名噪一時

亦以此坎壈失職傲然不屑也書學東坡尤善飛白
此卷皆自書雜詩中冥蒙二章如云天子傅粉墨臣
亦舞八風古人略小節其寃莫能終小噐易以滿如
狂彼愚蒙晉家嗜放達四郊生兵戎優孟何足爲致
身忘其崇似爲南渡甲乙時事而作關中名士予生
平交善者如三原孫豹人枝蔚韓聖秋詩華陰王無
異弘撰富平李子德因篤郃陽王幼華又旦富平曹
陸海玉珂皆一時人豪要當以岸翁爲冠

李瓚貽管夫人畫竹卷長丈餘離披錯落姿態百出
與怪石奔峭相間氣韻生動真奇作也後自題二句

云竹勢撒崩雲觸石應是瀟湘夜雨時皇慶三年秋

日作道昇下方有管氏道昇仲姬二印

湖州天聖寺壁有管夫人畫竹或題其旁

云數枝密葉數枝疎露壓烟啼秋雨餘

宋室山河多少淚畧無半點到絲絃

瓚又貽韓苑洛先生墨蹟一卷自書平陽絕句蓋四
時詞也詩云汾水春深落晚霞綠堤十里盡桃花畫
船簫鼓遊人醉漫說風流是杜家薰風綠沼碧荷香
玳宴歌兒舞袖長一醉襄陵傾百盞不知風景是平
陽姑射泉邊萬竹稠清風樓外四山秋重陽醉後歸
來晚黃菊紛紛插滿頭清曉寒霜候早朝小僮羸馬
禁天遙平陽判府催徵出檠戟重羅過豫橋自署苑

洛生稿苑洛理學經濟一代偉人而詩名不及其弟
五泉之著詩亦以人重耳

總兵官蔡元疏請修築邊牆 上命閣臣集九卿

面詢可否以聞羣臣未及對大學士伊桑阿公傳

玉音云衆志成城豈在邊牆羣臣肅然曰真大哉

王言也尋有 旨不准行

前太子太傅加太子太師保和殿大學士兼禮部尚
書致仕杜立德卒公寶坻人崇禎癸未進士卒年八

十一賜諡文端

內閣以文端文毅文肅文
定等上 欽定今諡云

巡視南城監察御史阿爾賽畢興霖阮爾詢等題爲

曲全孝義以敦風花事據江南鳳陽府亳州女子王

氏告稱

云

該臣等看得王知禮卽叛案牽連李範同

之子李殿機也其母張氏給配象房校尉王福殿機
年甫三歲因冒王姓後充校尉經鑿儀衛革退賣身
鑲紅旗佛爾海佐領下厄爾庫之家據幼聘王氏稱
年三十四歲伊叔王中凡伊兄王邁千逼嫁決志不
從探得伊夫尚存不忍卽死守婦人從一之義匍匐
千餘里外誓圖完聚此女子真有丈夫行也據厄爾
庫稱我本一窮巴牙喇價買李殿機供役復買蕭氏
配爲夫婦今重王氏節義不取伊僕身價情願斷出

又不忍拆離李殿機已配之婦并許與蕭氏同歸輕財好義此巴牙喇真有義士風也據范一魁稱年六十二歲但以異姓人攜一女子同行跡涉嫌疑事干非分因喚穩婆更番驗過已得真實處女之供是范一魁憐王氏立志尋夫不顧是非成敗護持完節似亦人情所難此皆 皇上至德深仁恩濡化洽人心風俗直媿唐虞是以女子懷貞匹夫嚮義共成一段奇緣播之海內傳之千秋知聖世貞節之風超出往昔載籍之外如此臣等查在官人與旗人原有定例何敢越例妄請但王氏矢志守節冒死尋夫若不

准其完聚王氏無從歸着情事可憫雖據厄爾庫稱
情願斷出聽其完聚然又非現行之例臣等因事關
風化仰體 皇上堯舜不忍一夫一婦不得其所

至意輒敢備述上聞格外之仁均候

睿斷

云

事下

禮部議得李殿機先應役于象房後鬻身于旗下雖
無放出爲民之例但亳州女子王五姐逼嫁不從千
里尋夫巴牙喇厄爾庫不取李殿機併蕭氏身價情
願放出爲民應將李殿機併蕭氏等准其出旗與王
氏完聚仍令王氏母家給與資賠令其得所可也康
熙二十八年四月二十九日奉 旨依議予山居

時于邱鈔見此疏竊歎王氏以未嫁之弱女其夫幼更患難歷三十載生死契闊不復相聞卽叔兄勸其改字亦非悖理乃崎嶇千里堅貞百折卒成其志奇哉女子真可愧世之鬚眉丈夫多矣至于厄爾庫輕財利而慕義范一魁冒不韙以全貞皆有古人之誼良史所宜大書特書者不可以無傳焉予承乏中丞時阮侍御貽以全疏刊本因節錄之

山東濟寧州民盧行之父廷輔以康熙十三年爲異母弟廷獻毆死行尚幼穉及年十五其母劉氏病不起語以父死之故令長大爲父報讐行泣涕受教時

廷獻避居金鄉縣行以孤孱未敢輕發乃僞與廷獻
子阿黑和好若忘前事者廷獻信之康熙二十九年
七月初八日廷獻醉卧行抽刃刺殺之自縛詣吏吏
稽前案其族盧得捷盧廣居等詞證皆有左驗巡撫
讞上下法司核擬照祖父母父母爲人所殺而子孫
不告官司擅殺行兇人者杖六十律熱審減等答五
十奉 兪旨一時公卿士大夫無不奇行者

宋唐庚子西睂山集二十四卷詩賦十卷雜文十二

卷

以論記傳贊銘誌狀
表啓書說箴疏爲次

三國雜事二卷紹興二十一年朝奉

郎鄭康佐刊于惠州有鄭總呂榮義康佐及庚弟庚

子文若序徐渤興公鈔自何楷元子家藏本渤有序
庚自說云詩最難事也吾于他文不至蹇澀惟作詩
甚苦悲吟累日始能成篇史言名治察言諸論爲時
所稱予錄其古今詩爲二卷文賦二十二首爲一卷
雜事上下爲一卷都爲四卷庚生三蘇之鄉又前後
與東坡貶惠州而集中無一字及之蓋庚起家爲張
商英所薦其貶惠州亦以商英連染視韓子蒼異趣
宜其不爲睂山之徒歟

門人莆田林禮部麟焜石來寄宋林艾山光朝林綱
山亦之陳樂軒藻林虜齋希逸四先生詩鈔艾山與

朱子同時講學有重名稱南夫子官至國子祭酒集
賢殿修撰常論曾覲龍大淵不賀張說封還謝廓然
內批其立朝大節本末如此綱山其高第弟子樂軒
又綱山高弟也虜齋與後村同時予曾見所著三子
口義此鈔甚略然艾山已下皆以道學相授受風雅
非所究心也艾山文鈔一卷其族孫兆珂所刻云是
鄭山齋本僅二三十篇又多表啓祭文不足見其所
長後村稱其文高迫檀弓平亦驅韓固過情之論要
是南宋一作手予昔從黃虞稷俞邵借觀全集未及
鈔錄至今抱憾集中有與王宣子舍人書云讀書如

飲啖一日不得食便如此空茶三朝五日或不近書
卷虧耗不少是真讀書人語又云海中一山名耆洲
隔岸視之約五七里許一水可到有千家無一人讀
書亦有田數十頃可耕可食魚米極易辦可以卜室
讀書隔絕人世無賓客書尺之擾令人髣髴想像其
處如桃花源也兆珂號博雅所著多識編宙合編檀
弓述注等書傳于世

殿試策例有規式違式輒不得與上第康熙戊辰仁
和凌紹雯少習清書殿試對策遂用清書漢書兩體
寫之讀卷官奏請
上裁置二甲之末

刑部尚書杜臻遷兵部尚書工部尚書陳廷敬遷刑部尚書以刑部右侍郎高爾位爲工部尚書左副都御史李迴爲刑部右侍郎

德清舉人陳述古字雲瞻著簪雲樓集記一事云慈溪劉仲照家有老婢其曾王父幼時人也顏如五六十許少遇道士授藥一丸吞之永無疾厄亦不記某甲子爲生辰但憶若干歲時倭寇犯慈曾抱小郎君避某所獲免小郎君卽仲照曾王父也從康熙戊申逆推之已百三十八歲矣

康熙三十二年京城東田家有老嫗已百三十歲日

飲啖止水米一酒盃晝夜危坐形如嬰兒

楊龜山云齊桓公攘戎狄而封衛未嘗請命于天子而專封之也故春秋書城楚丘而不言其封衛蓋無取焉然則木瓜美桓公孔子何以取之曰木瓜之詩衛人之詩也衛爲狄所滅桓公救而封之其恩豈可忘也欲厚報之不亦宜乎在衛人之義不得不以爲美其取之也以衛人之義而已若春秋褒貶示天下之公故無取夫興滅繼絕善之大者況衛人報德之辭豈得不錄龜山以此辨詩春秋去取異同則可耳

桓公大義烏可沒耶

已下三條讀楊龜山集偶知

龜山論叔于田云仁且有禮矣而又有武焉固宜國人之所說而歸之而詩以爲不義得衆何也曰先王之迹微而理義消亾政教不明而國俗傷敗故人之好惡不足以當是非而毀譽不足以公善惡叔段不義而爲衆所說亦以衰俗好惡毀譽不當其實故也予以爲此意猶有未盡者人之賢不肖各有其黨黨羽嬖幸更相貢諛彼詎恤公論哉如淮南王之伍被左吳宸濠之李士實劉養正輩甘佐畔逆躬陷大戮此曹猶足以禮義責之乎此詩當是其黨嬖幸之屬造作以愚國人者而非其國人之愛之稱之也觀其

後公子封伐京京人叛太叔段則豈國人果悅而歸之哉

龜山論將仲子云共叔段繕甲治兵國人說而歸之而詩人以刺莊公何也曰叔段以不義得衆其失在莊公之不制其早也君明義以正衆使衆知義則雖有不義莫之與也雖有僭竊莫之助也尚何使人說而歸之哉民說而歸之則其取之也固不說矣故莊公難以仲爲可懷而終畏人之多言也此意亦有未盡嚴華谷云說詩者探莊公之心在于殺段而託諸父母諸兄國人以爲說冀以稔成其惡耳此駁後序

未盡莊公之惡則然而說詩之本意則未也叔段舊
有奪嫡之謀云及段將襲鄭公曰可矣蓋幸其釁自
彼作謂人不得以議我豈有涕泣而道之之意哉此
詩正以公與祭仲有殺段之謀故設爲公拒祭仲之
辭以天理感動之公論開悟之耳此言深得詩意如
龜山之論猶是以至誠待莊公矣

有女同車序曰刺忽之不昏于齊卒以無大國之助
至于見逐云刺字殊失詩旨張南軒曰忽之不昏于

齊未爲失也而詩人追恨其失大國之助者蓋見忽
之弱爲甚追念其資于大國或有以自立蓋忽者先

君之世子其立也正故國人見其逐而憐其無助嚴
華谷曰突挾宋之援以逐忽故國人惜忽之無援而
作此詩曰惜曰憐得其旨矣且忽所辭之齊女乃文
姜也豈爲不智哉

李泰伯觀文章皆談經濟其本領尤在周禮一書范
文正薦之以爲著書立言有孟軻楊雄之風在北宋
歐蘇曾王間別成一家予嘗病其不能詩長夏借讀
盱江集絕句間有似義山者如王方平云五百餘年
別恨多東征重得見青蛾擗麟始擬窮歡樂不奈閑
人背痒何璧月云璧月迢迢出暮山素娥心事問應

難世間最解悲圓缺祇有方諸淚不乾梁帝云凝旒
南面總虛名廟祀何曾暫割牲但學禪心能忍辱莫
羞侯景陷臺城送僧遊廬山云行非爲客住非家此
去廬山況不遐要見南朝舊人物池中惟有白蓮花
憶錢塘江云當年乘醉舉歸帆隱隱前山日半銜好
是滿江涵返照水仙齊著淡紅衫皆有風致此集乃
正德乙亥南城令孫甫刊本有祖無擇及泰伯自序
最爲完善予家藏本差不及

新建縣令族姪懋才寄陳弘緒士業石莊集徐世溥
巨源榆溪集鈔本巨源集卽吾友陳允衡伯璣所定

別有榆墩集八卷則熊人霖伯甘所刻者夏小正解
東園類語詩話伯璣本所無二君南州看日士業之
文暢巨源之文潔觀石莊西陽藏書鈔本書二記榆
溪上虞山錢公借宋集書二君可謂真讀書人名下
故無虛士也番禺黎延祖方回亦寄其父遂球美周
蓮鬚閣集至索序美周與二君及萬時華茂先友善
巨源序美周集以太白子瞻擬之推許過情要亦崇
禎末一才士也

居易錄卷十二

濟南 王士禛 著

徐世溥作諸葛武侯無成論略云諸葛之出師卽周公居東之志也其盡瘁而無成功則昭烈如其不才卿可自取一言旤之也人固有終其身若渾樸寬厚而不能不敗露于將死斯言也昭烈之疑忌盡見生平深險畢露非惟昭烈不知孔明孔明亦不知昭烈甚矣彼以飛羽旣沒老宿無人嗣子冲愚而亮以良平之才據伊周之地一旦之後有蜀者未知爲劉氏子否也故若示以關心見誠而實豫防逆折之自取

一言猶曰蜀卿之蜀也卿欲取任自取之但勿戕吾

子云耳

云

予讀之駭然古來論昭烈者曰帝寬仁大

度能得人死力知人待士有高祖之風及其託孤之

際君臣肝膽相照無纖芥形迹何其盛也卽曲筆如

陳壽亦曰弘毅寬厚知人待士有高祖之風英雄之

氣及其舉國託孤于諸葛而心神無二誠君臣之至

公古今之盛軌也陳后山云昭烈謂武侯

云

其勤勞

一生蓋爲漢計豈爲子孫計哉乃周公之用心也論

忠武侯或曰三代以上人物或曰王佐之才或曰近

伊尹之出處或曰出師二表與伊訓說命相爲表裏

又曰勸昭烈伐劉璋而迄取之後世不以爲貪昭烈
令輔後帝曰苟不可輔公自取之孔明不以爲嫌專
國一十二年後主不以爲偏故魚水之契古今美之
不聞有異議也荀子論齊桓公云倓然知管仲之能
足以託國也是天下之大智也遂立以爲仲父是天
下之大決也昭烈有焉世溥何人而敢于污鱗先賢
如此徒見其狂諄無忌憚而已薛能詩當年諸葛成
何事只合終身作臥龍後人非之及周岌之難人以
爲口業之報該聞錄云薛能從事西川每短諸葛功
業厚誣之見于詩不一而足竟不免許州之禍世溥

居身錄卷十二
晚死于盜安知非口業之報哉斯論也罪浮于能矣
趙清獻公集十卷衢州舊刻本有景定陳仁玉至治
蒙古僧家奴鈞二序門人太倉進士曹延懿言相國
鄴園李公昔爲制府鎮三衢軍旅之暇訪清獻之裔
祇一農家子目不知書呼見之爲補奉祀生員居公
祠側以奉烝嘗公常有退居十詠如高齋竹軒諸遺
蹟皆不可識惟濯纓亭爲後人重建今尚存族子文
錦爲衢守予以修葺清獻祠堂及修補集板屬之
文潞公身都將相功名蓋世而其詩婉麗濃嫵絕似
西崑予向摘其佳句著之池北偶談趙清獻詩亦有

似潞公者殊不類其爲人如暖風云薄袂欲雲散輕
雲舞袖低簾疎蕩樓閣塵暗逐輪蹄絮亂垂楊道香
流種藥畦春牕惱春思一枕杜鵑啼芳草云翠密馴
文雉叢深隱畫輪離披金谷曉寂寞茂陵春古渡班
荆客長堤走馬人芊芊似袍綠一雨一番新杜鵑云
響亂書牕外人驚夢枕中江城啼曉月澤國愬春風
柳道盤餐綠桃園躑躅紅年年來此地畱恨任西東
寒食云城郭青烟散郊園麗日長鬪雞紅錦翅遊騎
紫絲韁有蝶俱含粉無人不惜芳儘拚花下飲歸去
醉成鄉觀水云澄江抵練長極目路蒼茫烟芷差差

綠風荷柄柄香西流終古恨南浦鎮時怵擬待傳辭
意離人在楚鄉右數詩掩卷誦之豈復知鐵面所爲
耶

江西巡撫宋牧仲中丞寄三孔文集宋中書舍人文
仲經父禮部侍郎武仲常父金部郎中平仲毅父也
經父以范蜀公薦對策九千餘言力排安石觸其怒
罷歸常父詆王氏學毅父以不行新法爲董必所劾
安置英州皆元祐君子也史稱文仲集五十卷武仲
集百餘卷平仲有續世說珩璜新論諸書今三孔集
通僅五卷周益公序云慶元四年太守濡須王蓮訪

遺文刻之存一二于千百則三公之文在南渡之初
已多散佚今所傳五卷又非慶元之舊矣三公以氣
節重當世不甚工詩經父制科策首嚴王霸義利之
辨剴切似劉蕡其論李訓義不顧難忠不避死而惜
其情銳而氣狹志大而謀淺足破羣瞽拍肩之論常
父論唐憲宗相皇甫鎛逐裴度蓋爲安石惠卿輩而
發蝗說謂新法之害鼠說謂熙豐用事之人雞說謂
王呂之不終魯雞以喻安石蜀雞以喻惠卿也毅父
文僅表啓無可觀蓋佳處不傳多矣惜哉

牧仲寄新刻梁苑諸集故相沈文端公龍江先生亦

玉堂集公爲先太師公

諱象乾明
兵部尚書

房師是集太師所刻

凡二十八卷今本纔十卷公直方勁正有古大臣之
節其文曉暢洞達根極經傳如韓魏公司馬溫公集
中議復建文年號立景泰實錄疏乞停下河南取麒
麟疏請建儲疏請並封恭妃疏乞宥議禮諸臣疏論
戚畹鄭承憲乞恤典疏議秦府進封疏因災陳言疏
請罷礦稅疏納諫疏乞免發私宅票擬疏皆關時政
之大者古所謂社稷臣也

偶過慈仁寺市得琅邪王若之集若之字湘客故明
戶部尚書基之孫也歷官叅議孤情絕照清談如晉

人服官畱都放情山水買舟遊武林窮湖山之勝三
忤奄寺罷官居金陵乙酉避亂姑孰干戈崎嶇獨載
三代古鼎彝法書名畫兼兩連舳寢食與俱其答人
書云正惟草莽之中當堅守一之節遂死所與遊者
鄒南臯馮少墟鍾龍淵張藐姑李懋明左蘿石諸公
皆一代偉人湘客詩清真無啓楨氣習最工赤牘單
辭片語逼似晉宋間人絕句云素宇流孤月清光照
雁聲似從千里外寄與故鄉明驢背肩似山笠下眼
如海偶見漁樵人行歌互相待恰遇青山白水忽來
細雨斜風俗駕還多高寄便止宿于此中若言造物

勞人那得伯師遮道清涼是大藥王一拂一濯甚好
片時眼界澄清鼻觀與之俱省脫巾解帶匡牀消受
荷花百頃圖書篔簹笠戴輕舫雨雨風風去不停疑是
烟波垂釣者居然呼吸有樵青三十寒香遶屋栽果
然林下美人來狂夫白許非寥落眷屬妻孥總是梅
聯句如風雨松堂集燈殘經不明風烟無市色時令
屬山秋半將春事負始有故人來戶外惟羅雀牀間
復鬪牛如何橫白雨忽已失青山雨餘春尚冷江上
柳初眠正是春潮長還畱暮雨時登高逢九日不速
恰三人扁舟乘曉霽歸俾作浮家學語兒呼吸消閑

婦鬪茶林端秋露滴草
候蟲鳴碧藻浮沈處白蓮
三兩枝皆非凡語

京師殺牛驢者最爲殘忍予爲中丞時嘗諭五城痛
禁殺驢者而殺牛皆回回人雖以世祖章皇帝

之誠諭不能禁也一日讀李叔則河濱集愛牛說云
肉牛者十之三革牛者十之三角牛者十之四天下
於是無全牛矣爲之惻然悚然叔則古文才極橫特
未簡耳論說諸篇尤多可觀

莆田林人中字中子因其舅氏同年張給事松齡致
其先人小着黻黻集乞序小着諱嶧明末癸未進士

以文章鳴甌越者也書云人中海陬未學藉先人緒
餘得侍巨公長者之側竊聞當今藝苑之中執牛耳
主盤匱爲詞林繁露者首推新城阮亭先生其文章
英妙足以鼓動一時其人地高華足以踔厲天下凡
世之游光揚聲者得其一言皆可附而不朽私心嚮
往久矣僻居嶺瀝山川綿邈無從瞻溯龍門附灑掃
之役后山一瓣香二十年來自比白頭孝逸未嘗私
以許人也側觀史策以來文章之家吮毫濡墨仰屋
梁著書指不勝屈然求其傳也必得當時一二巨公
敘而表之然後可以行遠而垂後故以穆伯長之文

待歐公而論定徐文長之集遇中郎而始傳蓋古之君子推崇前修鼓勵後學遇其可傳者則敘而傳之不必盡屬其夙昔之知交亦不必盡俟其子孫之造請也人中先人壯年筮仕夙爲溫陵銅山諸公所器重及早歲里居與同社余賡之先生磨礪古學杜門著書置身簡佚以此致忌者側目亦與賡之先生同難遺集十餘卷同鄉知言之士每以子業昌穀二公相位置殺青已久二十年藏弄篋笥未嘗妄求玄晏蓋追先人簡佚遺性非其意中推許之人斷不敢以鄭重陳乞也伏念先生泰山北斗今日之所謂歐公

中郎者也而先人軾軻沉抑才不配年卽歐公中郎
之所致歎伯長文長者庶幾近之則以伯長文長之
遺集求當今之所謂歐公中郎者敘而傳之實先人
意中之所深願者也且以先生之文章聲氣遇世之
失職無聊者猶爲游光揚聲不惜獎進而羽翼之使
在當今之時有如伯長文長者其人雖往其集猶存
又重以子孫之請謁雖無夙昔之交然推其生平簡
伉不妄許可之懷一旦有子孫焉體承先志鄭重造
請當亦先生大雅所不棄也懷抱廿年不敢以疎賤
徑進謹因家舅張黃門同年之誼託爲介紹冒昧進

前懇乞鑒其區區不惜一語爲其序迹實先人九京
之下所望以傳後無疑也主臣

嘉善魏替嗣寄宋駙馬都尉王晉卿疊翠爭流圖一
卷有紹興御璽晉府書畫之印敬德堂圖書印范長
白允臨跋尾王輦石谷定爲真蹟

李叔則楷云內典如佛塔廟一句疊三實字栢梁詩
一句七果名太白詩一絕句五地名文機故用虛非
實字則不壯予觀霧堂集多發前人所未發詩文頗
奧衍聳拔有奇氣恨才多不能裁割加聲律不叶未
免拗折嗓子如昔人所謔耳六月坐朝房會議偶涓

來少宗伯問霧堂集答之如此

竹垞過邸舍云近著一書曰經義存亡考以鄭夾漈經籍志作骨而附益之不傳者存其目其傳者略論作者之意辨其得失蓋倣西亭授經圖兼用晁公武讀書志之例也竹垞篤好經學所錄多鄞范氏天一閣禾中項氏及曹氏倦圃溫陵黃氏千頃堂祕本

竹垞又言近寫得彭汝礪鄱陽集洪丞相盤洲集王炎午吾汶集程鉅夫雪樓集予因詢竹垞所見唐人文集自韓柳元白數集外則張曲江顏魯公獨孤及劉禹錫元結李衛公陸宣公杜牧沈亞之呂溫李觀

司空表聖皮日休陸龜蒙羅隱皇甫湜李翱孫樵劉
蛻黃滔歐陽詹二十餘家皆予所及見者若富嘉謨
吳少微李華蕭穎士賈至李翰樊宗師梁肅盧肇馮
宿劉軻之徒皆不見其全矣

陸務觀過巴東弔寇萊公有詩云人生窮達誰能料
蠟淚成堆又一時蓋以蠟淚成堆爲公貴後事耳予
讀后山談叢云萊公性豪侈自布衣夜常設燭廁間
蠟淚成堆及貴而後房無嬖幸則自其微時已然旣
爲宰相乃所謂無地起樓臺相公也此萊公英雄本
色所以不可及

予選五言七言詩及唐賢三昧集二書皆姜西溟徵
君序之又選唐人選唐詩自河岳英靈已下八家益
以韋莊又玄姚鉉文粹爲十種乞序于朱竹垞太史
太史復書云姚氏文粹旣入選中則英華鼓吹三體
衆妙聲畫正音萬首絕句諸本似不應遺顧予取吳
興以其獨載樂府古調詩在五季詩道卑靡之後有
復古之功非諸家所及若英華萬首取備故博而雜
鼓吹三體惟錄格詩氣格卑下衆妙二妙亦然楊仲
弘唐音品第略具而又多紕漏不及高氏品彙之詳
審聲畫止題畫之作歲時雜詠僅節序之篇皆非文

粹比也故略論之有暇當取前諸本益以文章正宗
唐人詩唐釋子弘秀集續爲一書恨安石百家選無
從見之耳

陳后山云韓文黃詩有意故有工若左杜則無工矣
然學左杜先由韓黃此語可爲解人道

鄒忠公浩道鄉集四十卷其子柄栩所編有李忠定
公序邵文莊寶後序正德七年壬申重刊本也道鄉
立朝大節在諫立劉后論章惇二事其立后疏古今
仰之如泰山北斗劾章惇三疏其二云元祐之朋黨
方絕後來之朋黨又熾其三云惇在元祐初詆斥先

帝保甲之法以爲非是其言甚力自陛下躬覽以來

凡語及先帝者槩從竄逐唯惇久置不問

云

則是薰

蕪不分且躋惇于元祐君子之列其言諄矣無怪蔡

京立黨人碑而惇倖竄名其末也先生受學程門而

特嗜禪理詩文多宗門語居衡昭時古詩時似樂天

格詩深穩與葉石林工力相敵北宋之雄也零陵有

市戶呂絢者嘗以錢二百萬造大舟以俟先生後北

歸呂以舟送至江南先生謝以五絕句云平生親友

漫紛紛有幾書來寂寞濱二十萬錢捐不惜可憐湖

外有斯人瀟湘起柁出江湖日日乾坤展畫圖白酒

紅魚對妻子鴟夷還似此行無若絢者抑何可使其
無聞哉

道鄉序括蒼易傳云先生王文公高第也三聖之所
祕文公旣發之于前文公之所略先生復申之于後
先生于斯文豈曰小補之哉則道鄉又服膺荆舒之
學其立言駿而不醇如此其曰雖居軒冕之間當有
山林之氣節義文章學術大抵皆然乃名言也又曰
范丞相忠宣公平生奏對稱引止是孝經論語孟子周易

二則見
語錄

西塘先生集九卷宋福清鄭介公俠著萬曆中其鄉

人葉文忠公向高得祕閣本刻于金陵隆興甲申公
之孫嘉正守建昌軍刊本也有黃祖舜序嘉正之孫
元清跋云乾道丁亥侍郎簡肅林公出鎮九江鑄板
郡齋淳熙改元太師左丞相史公出鎮鄉邦復取是
集親爲題跋而刊之蓋先生集南渡後凡三刻今本
乃第四刻也先生之人所謂浩然之氣至大至剛其
爲詩文亦如之大抵似石守道而無其怒張叫呶之
習有德之言仁者之勇彷彿見之古詩如古交行呈
子京等篇在樂天東野之間近體和荆公何處難忘
酒一章令奸邪九原之下猶當慙汗先生子壻卽艾

山林光朝也先生之弟侃登元祐三年李常寧榜子

汝石

按傳誌先生子一人
穎早卒此必有誤

崇寧五年蔡薤榜侃子良臣紹興

二年張九成榜汝石孫永年紹興三十年梁克家榜
椿年隆興元年木待問榜良臣子恭乾道二年蕭國
梁榜永年子牧之紹熙元年余復榜椿年子嗣之開
熙元年毛自知榜牧之子格淳祐四年畱夢炎榜終
宋之世科第不絕天之眷忠義其至哉

一拂先生少隨父遊宦金陵讀書清涼山寺深爲王
介甫所器鄱陽楊驥來學于介甫介甫命從先生學
及調光州司法叅軍讞疑獄四五事介甫在政府皆

如所請任滿入京介甫勉令試法不應又令子雱婿
黎東美諭意將辟爲修經局檢討皆力辭且曰丞相
一旦當軸發言持論無非以官爵爲先所以待天下
士亦淺矣果欲援俠而成就之取其所獻利民便物
之事行其二三使進而無愧不亦善乎介甫爲先生
第一知己而至于義利之辨不稍詭隨如此若先生
乃可以報知己矣

文昌雜錄單父龐文英著宋人說部之佳者予家有
寫本文英官禮部郎官丞相穎公之子也後山集有
贈舅氏龐大夫詩云傳家聲烈三公後貯腹平生萬

卷餘謂文英也後山爲潁公外孫又有龐謙孺字祐甫南渡後客吳興著白蘋集見吳興掌故

后山寄山谷書云正夫有幼子明誠好文義每遇蘇黃詩文雖半簡數字必錄藏以此失好于父幾如小邢矣乃知向歆無足怪者正夫謂丞相挺之明誠與婦易安居士撰金石錄后山與丞相僚壻也小邢謂恕子居實

以順天府府尹衛旣齊爲都察院左副都御史

趙清獻集有劾陳恭公執中嬖妾殺婢二奏反復不遺餘力予竊不謂然一日讀范蜀公疏言今陰陽不

和財匱民困盜賊滋熾獄犴充斥執中當任其咎臺
省捨大責細暴揚燕私若用此爲進退是因一婢逐
一相非所以明等級辨堂陛也不覺歎服如蜀公者
真可以爲宰相元祐之初獨高臥不肯起其風概又
出元祐諸賢之上

吾汶橐九卷安福王炎午鼎翁著炎午以生祭文丞
相得名然他文乃似里社餅肆中慶弔卷軸之語晚
以書干姚叅政貫學士自比于夔下之焦尾若唯恐
其不已知者誌父之墓又必于當世顯者是求此數
端皆所未喻集中惟張尉舊祠堂記頗佳不減羅鄂

州社壇記存此一篇足矣

洪文惠适盤洲集十三卷有詩無文按經籍志集八十卷此非其全也文惠與弟文安遵文敏邁同登館閣文名滿天下號稱三洪時朋芻炎兄弟亦稱三洪而功名爵位遠不及此集十卷以下皆挽歌樂章詩餘無足錄八卷九卷皆雜詠盤洲山水草木擬李衛公平泉諸詠紫薇云十年三雁序接翅紫薇垣史稱其家居十六年兄弟鼎立以著述吟詠自樂猶可想見其盛也其父忠宣公松漠紀聞及景伯隸釋景嚴泉志景盧容齋五筆夷堅志唐人萬首絕句今皆傳

于世

盤洲集和景盧野處解嘲詩園池如此休言小但放
芻蕘雉兔行但字注平聲與徐騎省莫折紅芳樹但
知盡意看同二公皆精說文之學也

嘗讀耶律文正詩花落餘香著莫人蓋本朱淑真詞
無奈春寒著摸人語適讀宋彭器資汝礪鄱陽集有
湖湘道中見梅花絕句云滴葉開花妙入神酥盤憶
看北堂春瀟湘此日堪腸斷隨處幽香著莫人乃前
此矣唐人唯元白集中多用此等字未暇考長慶集
也經籍志汝礪集四十卷今才十二卷

世謂東坡教壞司馬君實字僕后山談叢別記一事
云參寥如洛遊獨樂園有地高亢不因枯枿生芝二
十餘本參寥謂老圃曷潤澤之老圃曰天生靈物不
假人力參歎曰真溫公之役也合觀二事溫公之修
身齊家可見與安石在鍾山見老兵善掃地而喜一
旦誤仆燭卽大怒斥去正可互觀也

山谷云氣蒸雲夢澤波撼岳陽城不如雲中下蔡邑
林際春申君疎影橫斜水清淺暗香浮動月黃昏不
如雪後園林才半樹水邊籬落忽橫枝此論最有神
解後山詩話別記云魯直謂笙歌歸院落燈火下樓

臺不如落花遊絲白日靜鳴鳩乳燕青春深氣蒸雲

夢澤

云

不如光涵太虛室波動岳陽樓此語大減上

二聯雅俗判然不煩秤量下一聯孟句雄渾天成若
光涵太虛室是何等語必記者之誤非黃論也

談叢記趙元考云寒食麩臘月雪水爲糊則不蠹南
唐煑糊用黃丹王文獻公以皂莢末置書葉間然不
如也

辛未三四月京師不雨多風霾四月十八日職方督
捕員外郎郭里入署稍早至皮市忽大風起見有神
人朱衣白馬自北而南形貌甚偉風旣過從人猶見

其馬尾視郭里已擲馬下所乘馬屹立于旁問之懵然不覺也歸病三月餘始愈

太平寰宇記□百□□卷宋樂史撰世無刊本予家有寫本闕七十餘卷竹垞嘗借鈔之又借徐氏藏本補足六十餘卷尚闕第四卷及百十三卷至百十九卷僅闕十卷聞金陵焦氏有宋刻本今歸吳廬澤弘侍

郎

南昌王孫朱鬱儀謀璋博雅好古與周藩西亭相頡頏著書至百種時卿名統錯撰古史記四十卷及詩解頤等書予已著之皇華紀聞第二卷又有奉國將

軍隱之名謀聖號厭原山人博雅精六書之學嘗刻
薛尚功鐘鼎欵識陶南村書畫史會要及江西宗派
詩寒玉館帖又嘗參學于大通禪師亦一畸人

古來奸雄多工書如李斯趙高曹操鍾會劉曜王敦
桓溫劉裕劉毅桓元郗超朱溫之屬下至盜賊亦有
之梁虞龢論書表云盧循素善尺牘尤珍名法西南
豪士咸慕其風劇賊乃亦嫻此真可怪也戴若思亦
工書

虞又云謝靈運母劉氏子敬之甥故靈運能書而特
多王法昔人云王氏例能書謝氏例能詩予按謝氏

自文靖庾肩吾書品
列中之上

已來尚奕萬一晦敷方明靈蓮惠連綜

靜桃藻皆擅書名乃至道韞亦云善書知前賢未爲

篤論也

謝氏蘭玉集自安石歷梁陳凡作者十六人吳興
江聞序安石移葬長興之九鷗岡見吳興掌故集

書史會要王曠導從弟與衛氏爲中表故得蔡邕書
法于衛夫人以授子羲之則是右軍父子皆經衛指
授也衛授筆法于蔡琰書法之傳在二女子亦自一
奇

書史會要云彩鸞不知何許人作楷字小者至蠅頭

許有大字法書唐韻極有功近類神仙吳彩鸞慕彩

鸞故名按唐韻卽女仙吳彩鸞所書以若所云似屬

居身錄卷十一
七
二人南村謬誤耶又云許渾不知何許人按唐詩人許渾潤州人居丁卯橋名籍最著南村草草乃如此又李北海書碑自刻之託名曰蘇靈芝乃云靈芝書生嘗爲易州刺史不知何据

廣南人以荃爲茶予頃著之皇華紀聞閱道鄉集有張糾送吳洞荃絕句云茶選修仁方破碾荃分吳洞忽當筵君謨遠矣知難作試取一瓢江水煎蓋志完遷昭平時作也又有藷荃菜詩云丹桂葉舒推重碧木蘭花發避深紅皆可入南方草木狀也李仲賓學士言交趾茶如綠苔味辛烈名之曰登或卽荃字見

研北雜誌

懸榻編有神化虎記事云順治乙未春三灘人寧某鋤田次有虎搏之寧急舉鉏中其頰虎委去寧疾歸呼鄉人躡之乃入一古廟神像頰上鉏痕宛然泥污尚濕碎視其腹得人骨甚多始知前虎神所化也遂焚其廟而虎亦絕又汀州丘舉人長厚人也年七十餘一日夢神告曰明午有五僧到門化齋可厚待之或索酒肉恣予勿靳次日晨起如其言治具亭午果有僧五人至齋之未足又出酒肉令恣食僧喜逡巡出一籍示丘曰吾嚮者試君耳人言君長者良然君

名在此籍否者厄矣遂去丘遣人尾之至林薄間五
僧皆化爲虎咆哮而去汀人危允藏言如此又樵川
黃翁密溪人生三子俱壯矣乙未使耕田山中晨出
暮返一日鄰子告翁田蕪不治翁心怪之詰旦三子
出翁密尾之見三子入山林中自褫衣挂樹化爲虎
翁大恐奔歸告其鄰拒戶匿處迨夜三子歸扣門良
久翁不敢應鄰子從室中告其故三子曰有之帝命
所驅不自由也因嗚咽呼父曰罔極之恩寧不思報
無如父命早在劫中兒輩數日遠出正求其人可代
者今事旣露不可復止某衣領中有小冊幸爲簡付

不然父固不利兒皆坐是死矣翁取燭覓衣領果得
小冊皆樵郡應傷虎者翁名在焉翁曰奈何三子曰
父第開門當自有策勉從之三子受冊泣拜告翁曰
此上帝之命父可蒙厚衣數重勿結帶加黃紙其上
匍伏虔禱兒當救父翁如其言三子次第從後躍過
各銜一衣虎吼而去遂不復返亦危說予往聞江都
兪生述方審司土官母安順府陶生姊化虎事著之
池北紀談謂猺獍荒僻間有此事右數事皆在閩中
尤奇懸榻編南城徐芳著芳崇禎庚辰進士字仲光

亦號愚山明末曾知澤州

茅亭客話載靈池洛帶村郝醫及
利州任欄頭夫婦化虎事甚怪異

樂府拂舞歌有獨漉篇一作獨祿一作獨鹿宛委餘
編子史文選訓解云罍麗小網也音獨鹿按古辭云
獨漉獨漉水深泥濁蓋因水邊所見以起興漉祿鹿
三字舊俱無解則作網義釋亦通

韓退之于莽鹵縉徽帖安等字多倒用皆有據非杜
撰推之玲瓏之爲瓏玲噲吟之爲窰窰孟浪之爲浪
孟皆然若魯直以西巴爲巴西則趁韻耳
如何樹名九百歲一結實形如棗長五尺

華陰王弘撰無異寄其鄉王建常仲復律呂圖說二
卷蓋本諸朱蔡叅之李文利王子魚邢雲路諸書而

折衷以自得之義建常居河渭之間早棄帖括以著述自娛崑山顧炎武寧人訪之一見折服以爲吳中所未有蓋秦士之高尚其志者予詢王少司空嶽生

承祖

云建常邠州長武人

以僉都御史陳肇昌爲順天府府尹

光祿寺卿劉楷詹事府少詹事兼翰林院侍講學士
邵遠平罷

粵東洋舶有攜小鶴來自海外者高三寸長二寸許素羽丹頂喙脰皆綠與鶴無異貯以匣中置玉盃盃中貯清水水中浸珍珠二枚鶴立盃中竟日不食時

舍珠于喙旋吐于水開匣則振羽引吭而鳴聲極清
越長山李郎中予之客粵親見之粵西某山產小猴
如墨色亦僅長二寸許每千百相貫如懸繩下飲江
水黠者伺其飲發鳥銃擊之中斷而墜就江中取之
無一二生得者人發殺機微物失其威若亦毒矣哉
蜀石泉猴羅江犬子亦皆以小得名荷蘭小牛白質
黑文項領間有肉峯如橐駝予爲禮部主客主事時
親見之云

辛未夏刑部李郎中斯佺市一豕將生子會李生日
近私計若是日生子則捨之否則以供食其庖人是

夜夢偉丈夫九人直入內中呵之曰吾輩將有請于
主翁耳明晨以告而豕適出生子九李異之遂送之族
生池

周易錄卷十二終

居易錄卷十三

濟南 王士禛 著

予曩與亾友葉文敏論牛李之黨李爲君子牛爲小人勿論兩人本末卽視其所與之友可知文敏不甚以爲然適觀蒼山唐庚集寄郭潛夫詩云黔江清且碧瀘江濁而紅須臾盡變濁混混顏色同清固不勝濁此理天下通君視開成間牛李爭長雄卒之贊皇老不勝太牢公物理自古然徘徊歎無窮因憶吾前之持論非謬而文敏或別有見未必然也葉石林云李德裕是唐中世第一流人物可與姚崇並立而不

至爲崇之權譎使武宗之才如明皇之初則開元不難致良然

生男胎衣名紫河車別有草藥亦名紫河車生楚蜀峽山中范石湖詠之云綠英吐弱線翠葉抱修莖蠹如青旄節草中立亭亭根有却老藥鱗皴友松苓詩見石湖集

宋臨川王世說雖儂巧而有文外之味予己未年在翰林曾見吳客攜二帙索重價求售其一南唐昇元閣帖其一則宋槧本晉宋奇談略似世說忘撰人姓名至今恨之又予家有唐語林乃德州盧御史世淮

德水鈔本宋孔平仲作續世說今不傳何良俊作語
林以廣世說其書最傳焦竑作類林錢唐張墉作廿
一史識餘頗存古意廣信鄭仲夔作清言粗得一鱗
半甲耳近李清作女世說顏從喬作僧世說王暉作
今世說汪琬作說鈴皆倣而爲之者王汪二書記予
輩酒茗間語最多要是本色人難學耳

閏七月十八日內閣大學士學士傳

旨問九卿

以故吏部尚書鄂爾多行應謚法否皆稱其老成持
重云先是故內閣大學士兼禮部尚書杜立德訃聞
亦詢九卿然後予謚蓋易名之典其慎如此按明制

京官三品已上例予諡其品秩未高而侍從有勞或

以死勤事者不拘成例 本朝則六卿總憲始得

賜諡侍郎得諡者無幾人然諡具美惡上有 睿裁

下有清議亦不但以有無為優劣也

大明會典載洪武初議諡俱禮部奉旨施行二

十五年令本部行翰林院議奏請旨又本部行吏兵二部備查實蹟定為上中下二等以行業俱優者為上行實頗可者為中行實無取者為下開送翰林院

擬諡請旨 本朝則歸之內閣司之典籍云

南史丘仲孚傳每讀書以中宵鐘為限墨客揮犀云

古有分夜鐘則議張繼楓橋夜泊詩者真兒童之見

也

翡翠產粵中予于皇華紀聞詳其族類然所謂翡翠

屑金乃別自一物歸田錄歐陽永叔家有玉罌一形
製甚古以爲碧玉在頰以示座客有兵馬鈐轄鄧保
吉者真宗朝老內臣也識之曰此寶噐名翡翠宜聖
庫有翡翠琖一隻所以識也後偶以金鑲於罌腹信
手磨之金屑紛紛而落始知翡翠能屑金也則翡翠
又玉石之屬

予自初仕揚州李官至叨九列三十年間往往謬司
文衡順治庚子江南鄉試爲同考官分較易二房得

盛符升

甲辰進士
纂御史

等十人康熙癸卯江南武鄉試爲同考

官得丘湛

甲辰武
會元

等十九人壬子以戶部郎中爲四川

鄉試正考官得楊兆龍等四十二人副之者工部員

外郎貴溪鄭公日奎戊午以翰林院侍讀為順天武

鄉試正考官得王來泰等一百八十六人副之者侍

講今內閣學士兼禮部侍郎韓公葵是榜羅淇中已

未武狀元湖州副將徐憲武中壬戌武狀元貴州副將繳煜章中丁

丑武狀元山西參將庚申遷國子監祭酒辛酉甲子兩值科

試矢公甄拔得士尤眾如壬戌之史夔春坊中允等乙丑之

高曜編修金居敬靈丘知縣等戊辰之湯右曾編修改給事中查嗣韓櫟眼編修

查昇編修等不下數十人率皆一時名士辛未會試為

考試官同事者文華殿大學士兼戶部尚書張公玉

書工部尚書陳公廷敬兵部右侍郎李公光地也得

張瑗編修改御史等一百五十六人而前在揚州日所賞拔

士如許承宣丙辰進士給事中許承家乙丑進士編修汪懋麟丁未進士刑部主事喬萊丁未

進士汪楫已未召試檢討河南知府許嗣隆壬戌進士檢討吳世燾戊辰進士編修張琴癸丑進士

中書劉長發丁未進士工部主事張楷丁未進士延平知府張琬彭士右夏九敘

王司龍之屬以文章登科甲者亦不下數十人予幸

生右文之代獲以文事自効略抒其推賢進達之義

少道罪戾詎非天幸聊疏其槩用示吾子孫云

少保兼太子太保昭武將軍提督江南總兵官楊捷

卒賜諡敏壯捷字元凱義州人予官揚州時與定交

甚契後兩爲山東提督文武協和兵民安堵武臣中
之賢者也甲子 上南巡捷朝 行在慰勞甚至
稱老將軍蓋異數云

吳郡門人惠周惕著詩說三卷言博而辨不主故常
可備說詩一家之言周惕字元龍康熙己酉予在淮
陰始來執贄及予爲祭酒又從遊太學辛未會試予
以兵部侍郎爲考試官周惕適以第六人中第入翰
林

以禮部左侍郎掌翰林院事庫勒納爲戶部尚書通
政使司通政使兼掌詹事府事尹泰爲都察院左副

都御史仍掌通政司詹事府事康熙元年已來一人兼掌三衙門者尹泰公及張公英也一人兼掌兩衙門者禮部左侍郎兼太常寺卿席爾達公也

以左通政劉元慧爲都察院僉都御史羅秉倫爲光祿寺卿

八月初一日保和殿大學士兼兵部尚書梁清標卒于位公真定人崇禎癸未進士卒年七十二無諡公與故大學士大名成公克鞏寶坻杜公立德皆直隸人又皆癸未進士至是前後卒公早登館閣拜大司馬年未四十歷戶禮兵刑四部尚書康熙戊辰以兵

書大拜在相位甫三年公精賞鑒蒐羅金石文字書畫鼎彝之屬甲于海內領袖詞林數十年風流弘長歸然爲鉅人長德予順治中未弱冠偕計吏入京師公與合肥龔端毅公鼎知之尤深在禮部戶部爲郎日又爲公屬每放衙吏散必引與論文章究風雅相期在吏牒之外龔公以癸丑厭世又十九年而公卒

公家世翔貴甲于河朔曾祖夢龍明吏部尚書諡貞敏兄清寬吏部侍郎從兄清遠吏部侍郎公亦以吏部侍郎拜兵部尚書祖孫兄弟四人吏部前後相望

繪紳榮之

吉顓間鳥有名功曹主簿者故予過泰和有詩云木客山都人比舍功曹主簿鳥多名茅亭客話云孔雀

名都護西陽雜俎云齊郡函山有鳥名王母使者

俗失物炙狼筋卽得段成式云武宗四年官市郎巾
因言僧泰賢爲涇帥段祐就西市賈胡市郎巾至修
竹南街金吾鋪偶問官健朱秀曰甚易得但人不識
耳卽于古培摘出三枚如巨蟲兩頭光帶黃色祐集
奴婢環庭炙之蟲慄蠕動一女奴臉唇瞶動詰之果
竊噐者則郎巾別是一蟲今傳訛作狼筋耳

巳巳冬十二月戶部主事族姪邨以前文登令行取
需次都下遣其族子景修歸鄆縣行至獲鹿遇于自
保等五人約同行不知其盜也早行至栢井鎮西櫬

殺景修而奪其貲及所乘牝馬既復東行途次遇
裕親王府護衛自山西勾當公事回京者與秦人候
補守備某某偕行至胡桃園皆宿焉明日盜早行而
舍其牝馬既而王府護衛行馬自高崖躍下從之屢
麾不去午次榆林鎮馬忽奔馳入一店隨視之則自
保等在焉詰其縱馬之故不服二守備搜其裝得景
修路引曰此吾秦人也今安在盜語塞護衛縛諸盜
詣保定巡撫于中丞成龍鞫之盜乃吐實皆論斬馬之
報冤奇矣

春秋左傳類對賦一卷似蓮珠體宋將仕郎試祕書

省校書郎徐晉卿撰海昌重刊本晉卿自序云余讀
五經酷好春秋治春秋三傳雅尚左氏然義理牽合
卷帙繁多顧茲諛聞難以殫記乃以暇日撰成錄賦
一篇凡一百五十韻計一萬五千言首尾貫穿十得
其九命曰春秋經傳類對賦北宋人也又有元至大
戊申長沙教授區斗英跋云是賦乃徐祕書所作江
陵路總管太原趙嘉山得善本授之郡庠俾鏗梓以
淑諸生予觀其比事屬辭頗自斐然然無關經傳要
義大抵宋人著述如事類賦蒙求之類皆類俳體取
便記誦云爾

康熙庚戌冬沛縣閻爾梅古古在京師先考功兄召
同吳江顧萬祺庶其飲予在座閻老而狂好使酒罵
坐酒間愚兄弟叩其所作閻朗誦數篇顧以前輩事
閻執禮甚恭至是起贊曰先生詩不減杜少陵矣閻
勃然怒直視顧曰小子何知何物杜甫輒以況我耶
顧面色如土踉蹌而已予殊惡閻之僭誕思抵巇以
折其氣有頃閻又自舉其雲中與曹侍郎秋岳倡和
近體詩當日戰場成遇禮至今兵氣滿寒空地高天
近星辰大春少秋多草木窮云予曰先生此詩可追
空同黃河水遶漢宮牆之作閻大悅曰知言哉向者

芝麓

謂合肥
龔端毅

云有詩當示西樵阮亭兄弟信然予徐笑

曰知言某不敢當然有一言相質先生謂李獻吉顧
出杜子美上乎閻愕然曰何謂也予曰適顧生以子
美擬先生某私以爲太過而先生怒斥之某以獻吉
擬先生而先生乃大喜然則獻吉不遠過子美乎此
某所未喻也閻赧甚不能答但連呼曰不必言且可
飲酒耳未久遁去明日西樵謂予弟昨困此老已甚
予觀閻作但工七言八句然率有句無篇又皆客氣
不合古人風調至七言古詩并音節亦不解直如瞽
詞信口演說世人但爲其氣岸所奪耳自法眼觀之

不免野狐外道

門人盛御史符升珍示云佛手柑臨水種之則多實
花色白或五出或六出陽月結實如指陰月結實如
拳

吳草廬于諸經皆有纂言詩獨無之禮纂言于家舊
有刊本易纂言康熙丙辰得之京師亦刊本也書纂
言寫本已巳冬初入都借之黃虞稷俞邵獨未見春
秋耳朱簡討云曾從吳郡陸醫其清家藏書見之

今人賦詩用事不詳出處譌謬相沿最爲可笑如彈
碁之戲西京雜記云成帝好蹴踘羣臣以爲勞體非

至尊所宜帝曰可擇似而不勞者奏之家君飲謂向也作彈

棊以獻博物志云魏文帝善彈棊能用手巾角時有

書生又能低頭以所冠著葛巾角撇棊故李義山詩

云玉作彈棊局中心最不平此與奕棊有何干涉而

今人率以奕為彈棊此類甚多

戊午夏予與翰林掌院學士今刑部尚書澤州陳公

廷敬侍讀學士故刑部侍郎謚文敏崑山葉公方藹侍講

學士今禮部尚書桐城張公英同內直每有御

製必命和進一日賜侍衛輔國公俄啓詩

云觀德由來尚古風手彎滿月綠沈弓云俄啓蓋以

宗室宿衛有穿楊貫札之能故

聖製云然

臣士禎

恭和云宸章高視漢歌風絕藝爭誇兩石弓自是

君王勤拊髀一時龍種盡英雄蓋此題有三難

御製首倡一也旌俄啓之射二也宗室而兼宿衛三也詩僅四句包此三義所以難也壬戌 賜宴

乾清宮賦昇平嘉宴倣栢梁體詩

御製首倡云

麗日和風被萬方和者自內閣大學士已下凡若干

人士禎時以祭酒領成均句云三德六行爲士坊翊日

詩成恭進

上手製詩序

御書之詩則

詔故詹事禮部侍郎沈文恪荃書之刻石養心殿摹

榻裝潢九月九日 宣賜與宴諸臣人一本真昇平
盛事云

張仁熙字長人楚之廣濟人隱居著書與竟陵胡承
諾君信吳驥旣閑蘄州顧景星黃公皆前代逸民有
名江漢間庚午冬寄予書時年八十矣書云仁熙聞
之古稱一代理人文必有英絕領袖之者翺湜籍漢之
於退之黃晁張秦之於子瞻是也而昌黎與于襄陽
書則曰或爲之先焉或爲之後焉取其責均肩之蓋
原本孟氏之旨以高其自據之地僕則以爲不然僕
以爲非真有憂世覺民之責如孟子者皆當遁迹利

名謝絕丐乞豹霧冥冥枯槁自腴卽間有須之殷而
遇或疎者合有道得有緣迹其間殆非一死生一旦
夕之故如俗所稱知己無憾者此夙契也而或因以
爲奔競砥焉何至如昌黎慷慨沾沾類有所挾而至
耶至于上之人一處高位汲汲求賢以奠邦國安民
人其於名譽之士長養而成就之其無所挾固明矣
僕少孤呶呶無瞻稍長知讀書亦嘗手執經卷山椒
水涯青磷白骨口不絕吟於兵賊疫饑之中年踰壯
多病卽決棄科目文字昔人有云王仲宣泥下潛蛙
何由翼繡虎哉甲辰曾一過都門聞濟南領袖復有

先生時苦京寓雜選一月卽歸歸而商丘宋牧仲通
守黃州迎致雪堂訓其子弟屢道先生已酉商丘別
去忽忽十五年商丘移節通州兒子佳晟因會試入
通見長者商丘爲致先生倡和評點種種大序且曰
近與阮亭宮詹屈指海內耆舊江漢間僕與顧黃公
耳僕心異之已而捧讀漁洋集天韻標令穎識通遠
間出光怪包合韓蘇而士之遊先生門者靡不曰入
阮亭之室而緒其派當世之頌說北面竊先生以爲
名者種種而僕終不敢楮墨付兒輩入都者上謁則
僕經經小人所謂遁迹利名謝絕丐乞者也數年以

來僕日益老食壤之蚓日昃不畱逾益閉影謝客而
敵友金蔚齋尺牘數千里道先生纒綵下垂不已或
曰秋水蒹葭或曰癖嗜項說至欲頽尺一下遺詫以
爲素未邂逅而神交若此且曰王先生退居古處至
勤 聖天子召問便殿拔之侍從僕至此殆不能
矜小節而嘿嘿于大君子之前矣大君子本領鑪錘
俾一切心儀古聖者旅大海而得指南又不第千古
著述何幸如之僕樸遯山林不敢附於作者三十年
前誤聽友人爲刻詩文少許向溷高賢視聽者卽此
本也近亦增稿數帙其稍異於前者詩有山川酬答

之作文多史傳論列之言貧艱繕寫排正仍以舊本
付小兒獻之閣下昔謝玄暉好獎聲名未達之士孔
闇聲施張茂先不棄窮巷侯門一分之善遂羅英傑
僕杜門已久枯槁自娛然仰先達以重生冀修名於
不朽雖古賢高隱間亦不廢王山子一字拔人黃公
衡不去口實或不至薄崔彥烈片言自達也翹首俟

命

太倉周瓚元恭以南公菴稿相示所撰明史稿也中
間載先太師先方伯先侍御事略頗具瓚熟史事梅
村晚年招與讀書或事有疑誤輒就問之瓚庚午夏

遺予書曰瓚於三十年前知有阮亭先生者非今之人而古之君子也意欲望見顏色而生於江南蒿蘆之下志氣弁鄙見聞單陋無以具行李又爲同里梅村先生畱訂春秋諸書朝夕晤對垂二十年弗獲造先生之門親奉謦欬梅村歿後饑驅出門糊其口於四方又逾十年而年漸遲暮自傷將終不得見先生矣去年踐故人之訂策蹇北來私心自喜可以一見先生而才至都門疾病顛連一身孑然及健菴南歸寄食同里錢黃門之邸暫爲蒙師嗟乎如瓚之遭逢亦可謂之不幸矣惟是先生爲一代之名賢三十年

所願見而不可得者今旣在此詎可覲面失之然又不敢貿貿而前遂恐終不得見故以一言介於左者瓚自少有志於史於有明三百年之人物粗有纂輯然中間尚缺十之二三而貧家無藏書可以考證又自以才之不充學之不裕識之不確未敢出而問世藏棄篋中有年矣前則梅村後則健菴俱未寓目今欲是正於先生乃旣無紙筆又無書人草稿塗乙不可以瀆高明終欲就先生謀之倘不棄微賤而辱見焉則請蠲吉以進幸甚

命太常少卿沙拜巡視廣東廣西鹽課閩粵鹽課舊

以巡撫兼理之至是始專差朝官亦由都察院題請
但不專差御史允兵科給事中卞三畏之請也

前太子太傅武英殿大學士兼禮部尚書吳正治卒
于江寧公漢陽人順治己丑進士卒年七十五

獨漉山人自粵東寄文待詔畫江南春卷長丈許山
水間多作招提蘭若中幅及卷盡處兩作瀑布最爲
奇絕卷首江南春三篆字卷尾嘉靖丙辰春日製七

字皆待詔自署書

獨漉山人陳恭
尹元孝自號

前文華殿大學士兼戶部尚書徐元文卒公崑山人
順治己亥狀元及第卒年五十八

命宗人府副理事官吳爾泰巡視福建鹽課

鄒平長白山有釋宗泐季潭石刻手蹟古今詩十五
首後題云右諸詩皆予洪武初雜處亂軍中迄今已
三十年偶持鉢過長白山宿劉老別業憶舊作書之
懽然自失時永樂二年九月天台釋宗泐滄溟跋尾
云此長白山名蹟也嘉靖乙丑三月歷下李攀龍書
其詩如戰城南江南曲祖龍行等作列朝詩皆載之
按季潭以胡惟庸之獄有連奉旨免死命往鳳陽槎
峰至江浦石佛寺示寂壽七十四事在洪武間而此
刻署永樂二年必有訛誤記之以俟考

無錫侯氏新刊十家樂府南唐二主

中主四首後
主三十三首

馮延巳

陽春集

宋嘉祐陳世修序謂二馮
遠圖長策不矜不伐云云

子野

張先

東湖

賀鑄

信齋

葛剱竹

洲

吳儆

虛齋

趙以夫有淳祐已
酉芝山老人自序

松雪

趙孟頫

天錫

蔭都刺

古山

張埜邯鄲人
有至治初元

臨川李
長翁序

皆在毛氏宋詞六十家之外向見宋牧仲中丞

所得李長文

昌垣

學士鈔本數十家不甚流傳者尚多

有之恐不止此也

都察院左副都御史衛旣齊改右副都御史巡撫貴

州

巡撫僉都御史
田雯以內艱歸

宋貴究墨前卷屢載之晁氏墨經云今兗州泰山徂

徠山

二山今
屬濟南

鳧山嶧山沂州龜山蒙山密州

今諸
城

九仙山

登州牢山

卽大勞小勞二山

皆產松之所究沂登密之山總謂

之東山東山之松色澤肥膩性質沈重品惟上上工則兖州陳朗朗弟遠遠子惟進惟迨與易水奚氏並稱又東坡題跋云此墨兖人東野暉所製每枚必十千信非凡墨之比東野氏周公之裔至今居曲阜云同年成愚崑其青州樂安人通知天文賊據岳州官軍未卽攻拔成時爲御史密疏言當于某月日克復岳州已而捷至如所言後長沙之捷雲南會城之捷皆密疏克復時日不爽遂內擢通政司叅議超拜太常寺卿進兵部右侍郎罷歸

余家與臨邑邢太僕子愿侗為婚姻故先祖方伯贈

侍郎公得其手蹟為多亂後盡化劫灰矣惟蘭亭序

白鸚鵡賦王摩詰二卷僅存余兄弟幼時從先祭酒府君

侍坐隅公顧謂曰邢書吾所珍愛今僅存二卷汝輩

先取科第者當得之勿負期望順治戊子先吏部西

樵兄舉鄉試公喜以蘭亭卷賜之辛卯余未弱冠繼

舉公尤喜又以白鸚鵡卷賜之此卷曹侍郎秋岳涖

周侍郎櫟園亮諸公皆有題跋記事

先方伯公有知人之鑒年九十餘聰明不衰嘗語祭

酒公曰汝諸子皆佳將來成進士者三人某某是也

幼者尤早達既而先西樵兄士以順治壬辰不肖士

以順治乙未先東亭兄士以康熙庚戌相繼成進士

而士禛得雋尤早異哉長兄壬辰會試士辛卯鄉試公

皆及見之

李侍講澄渭清言滇黔山水奇勝當以憑虛清溪二

洞爲冠清溪石筍最奇多不可以數計憑虛有大士

羅漢像皆鍾乳滴成最上有萬年田石方畝許縱橫

界畫皆如町畦之狀人工刻鏤不及也二洞之奇在

飛雲巖之上

又言五華山在滇城中明初命黔國鎮雲南畫滇城

形勢進呈請建府第之所太祖指五華曰此山有王
氣宜建寺于山巔其後永明王改建宮殿至吳世璠
作逆又居之明祖之言卒驗

諸城古東武卽宋密州坡公超然臺在焉縣學有石
刻坡八分書云明叔傳道禹功子瞻遊軾凡十字坡
書滿天下而八分僅見此石

東粵石刻惟滇陽峽周夔到難一篇最古予皇華紀
聞記之讀郭功父青山集補到難篇詩云文格迴欺
韓愈老字書尤逼小王真蓋宋人已珍重之如此此
文姚鉉收之文粹碧瀾之下寸寸秋色乃篇中奇語

元遺山詩云碧瀾寸寸皆秋色空對山靈說到難

汎字說文引爾雅云西至于汎國汎西極之水也府
巾切杜牧送孟遲先輩詩小溪光汎汎自注普汎切
宋黃仁傑夔州苦雨詩汎月不虛爲朽月今年賴得
是豐年汎音怕平聲東方朔傳令壺齟老栢塗塗與
汎同注云文加切

粵人食檳榔用萋葉牡蠣灰雜裹之葉卽扶畱藤一
名獲扶畱一名南扶畱顧微廣州記曰其花實卽蒟
也蛤名古賁燒以爲灰曰牡蠣粉詳齊民要術又吳
都賦曰東風浮畱廣州記東風華葉似落娠婦莖紫

作羹味如酪香氣似馬蘭

爾雅購蔕萋郭璞注蔕萋萋萋也生下田初出可啖
江東用羹魚故坡詩云萋萋滿地蘆芽短正是河豚
欲上時七字非泛詠景物可見坡詩無一字無來歷
也

爾雅曰荼苦菜可食齊民要術引詩義疏曰山田苦
菜甜所謂董茶如飴又爾雅曰檟苦茶郭璞注云樹
小似梔子冬生葉可煮作羹飲今呼早采者爲茶晚
取者爲茗一名薺蜀人名之苦茶齊民要術引博物
志曰飲真茶令人少眠前人乃謂古無茶字以茶卽

是茶大謬

皇覽豕記孔子豕笙中樹數百皆異種有柞枌維離
女貞五味冕檀之屬

以都察院左僉都御史劉元慧爲順天府府尹

府尹陳肇昌以

病請告

命禮部尚書熊賜履工部右侍郎王承祖爲武會試
主考官戶科給事中王原祁戶部郎中羅大美禮部
郎中莫之翰刑部郎中宋嗣京爲同考官

詩四始五際按詩緯汎歷樞曰大明在亥金始也四
牡在寅木始也嘉魚在巳火始也鴻雁在申金始也

卯天保也酉祈父也午采芑也亥大明也午亥之際
爲革命卯酉之際爲改正辰者天門出入退聽

以通政使司通政使黃斐爲都察院左副都御史大
理寺少卿宮夢仁爲都察院左僉都御史

九月二十一日九卿啓 奏會議直隸巡撫郭世隆

請停大計一疏三年大計仍舊行二年舉劾應停止

二十二日未刻 駕由景運門出 御文華殿

經筵講官滿洲戶部尚書庫勒納禮部尚書顧八代

工部尚書石柱戶部左侍郎阿山禮部左右侍郎席

爾達多奇刑部左侍郎傅臘塔漢吏部尚書李天馥

禮部尚書熊賜履兵部尚書杜夔刑部尚書陳廷敬
吏部左侍郎李振裕兵部督捕右侍郎王士禎翰林
院掌院學士兼禮部侍郎兼掌詹事府事張英內閣
學士兼禮部侍郎彭孫適尚書庫勒納陳廷敬講四
書放勳曰一段侍郎傅臘塔學士張英講周易立天
之道一節講畢 駕還宮賜宴太和殿前

二十五日 朝審畢過慈仁寺閱故書攤買得陶隱
居集三卷嘉靖中贛人黃吏部注汝霖刊于虔州宋
禮部侍郎王欽臣所集也有注及吉郡胡直序陳侍
中尚書令江總元序又二曹詩集各三卷唐詩人鄴

唐二曹也一臨桂人一陽朔人皆西粵產有蔣文定
公冕序文定亦粵全州產此集謝肇淛在杭刊于桂
林曹學佺能始序之

李少司馬厚菴

光地

戲謂予昔人謂讀書聲紡績聲凡

人家不可不有公在會議朝審班中屢有正論不肯
唯阿此聲亦 朝廷之上不可不有者也

命戶部侍郎博濟兵部侍郎李光地工部侍郎徐廷
璽閱視淮揚等處河工

以太常寺卿周之麟爲通政使司通政使太僕寺卿
唐朝彛爲太常寺卿

予過江西建昌縣南渡修水岸上有亭貯白樂天詩
碣一絕句云修江江水縣門前立馬教人喚渡船好
似當年歸蔡渡草風莎雨渭河邊愛其風調然未詳
蔡渡所在偶閱渭南縣圖經云渭水至臨潼縣交口
渡東入渭南境又東折至縣城北曰上漲渡又東南
流曰下漲渡又東北折而流曰蔡渡以漢孝子蔡順
得名其地有蔡順碑與樂天故居紫蘭村正隔渭河
一水耳

居易錄卷十三終

居易錄卷十三

三